

澹庵文集

胡
銓

文碩閣

wenshuoge.com

目录

关于我们	3
提要	5
澹庵文集原序	6
澹庵文集卷一	7
澹庵文集卷二	15
澹庵文集卷三	22
澹庵文集卷四	25
澹庵文集卷五	29
澹庵文集卷六	35
澹庵文集附錄	41

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案澹庵文集六卷宋胡铨撰铨字邦衡庐陵人建炎二年进士甲科绍兴五年以荐除枢密院编修官抗疏诋和议谪吉阳军孝宗即位特召还擢用厯官权中书舍人兼国子祭酒权兵部侍郎以资政殿学士致仕卒諡忠简事迹具宋史本传铨师萧楚明于春秋故集中嘉言说论多本春秋义例于南渡大政多所补救史但称其高宗时请诛秦桧今考集中论撰贺金国啓一篇则于孝宗朝召还以后更尝请诛汤思退又孝宗本纪隆兴元年三月金以书来索四州未报八月又赍书两省今考集中玉音问答一篇知答金人书孝宗已与铨定于五月三日迟至八月未遣必汤思退有以持之当时情势可以考见史文疏漏赖此集尚存其崖略也本传称铨集凡百卷今所存者仅文五卷诗一卷盖得之散佚之余然书录解题载铨集七十八卷宋志载铨集七十卷则在当时已非百卷之旧矣乾隆四十六年十月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

澹庵文集原序

故澹庵先生资政殿学士忠简胡公中兴人物未能或之双也绍兴戊午高宗皇帝以显仁皇太后驾未返不得已将以大事小屈尊和戎先生上书力争至乞斩宰相在廷大惊金人闻之募其书千金三日得之君臣夺气知中国有人奉皇太后以归自是遘马不南者二十年昔鲁仲连不肯帝秦秦军闻之为却五十里后人疑之以为説士之夸辞以今揆古古为夸矣以今观今今亦夸乎信所见疑所闻古今一也吾宋之安疆不以百万之师而以先生之一书后人闻之者乌知其不若今之人闻仲连之事者乎亦以为夸未可知也若今之人亲见先生之事则谁以为夸者今事之夸与否则可信与否则不较也使后之人无所疑于古之人者先生欤今不信古古奚病焉后不信今必当有时而无不信矣逢其事思其人呜呼先生之功其远矣哉先生之功其远矣哉先生之文肖其为人其议论阔以远其记序古以驯其代言典而实其事约而悉其为诗盖自觚斥时宰谪置岭海愁欲酸骨饥蛟血牙风呻雨喟涛谿波诡有非人间世之所堪耐者宜芥于心而反昌其诗视李杜夜郎防子之音益加恢竒云至于骚辞涵茫嶄峩鉢剡刻屈抉天之幽泄神之秘槁瘦而不瘁恫恻而不恻自宋玉而下不论也灵均以来一人而已夫是数者得其一犹足以行于今而传于后而况萃其百乎何其盛也何其盛也先生既没后二十年其子澥与其族子涣族孙秘裒集先生之诗文七十卷目曰澹庵文集欲刻板以传贫未能也之官中都舟过池阳太守蔡侯必胜相见因问家集慨然请其书刻之命郡文学周南董振之学録何巨源校讎之未就而蔡侯移守山阳雷侯孝友顔侯械踵成之嗟乎先生功被于中国名震于遘隅文范于学者学者得其片言半简犹宝之师之求见其书之全何可得也今三侯独能刻而传之以幸学者夫先生此集为之百年而始成使学者得之今乃一日而尽见三侯之用心可不谓贤矣哉而蔡侯首发其端可不谓尤贤矣哉万里尝学于先生者先生之言曰道六经而文未必六经者有之矣道不六经而文必六经者无之先生之文其所自出盖渊矣乎而万里何足以知之先生庐陵人讳铨字邦衡澹庵其自号也若其世系厯官行事则丞相益国周公书于神道碑云庆元五年己未八月廿八日通议大夫宝文阁待制学士致仕门人杨万里序

澹庵文集卷一

宋 胡铨 撰

制防

御试策一道

盖闻治道本天天道本民故视聴从违不急于算数占 而惟民是察持以至诚无逖弗届古先哲王罔不由斯道也朕承宗庙社稷之托于俶扰阡危之后懷父母兄弟之忧于携贰单微之时念必抚民以格天庶或悔过以靖乱逾年于兹寢兴在是故府库单匱军费倍滋而赋敛加薄外患未弭盗贼尚多而追胥有程择守令以厚收养责按廉以戢贪暴命令为民而下者十常六七凡曰聚所欲去所恶者朕未有闻而不恤恤而不行也然而迎亲之使接武在道而敌情未孚保国之谋刻意在兵而军势未张躬纯俭以敦本而奢侈之习未悛扩大公以示训而私罔之俗尚胜刑赏不足以振偷惰之气播告不足以革狂悖之心田畝未安旱蝗害歲豈朕不德无以动天聴抑政令失宜而民以为病乎何精神之弗效而祸乱之难戡也伊欲复亲族奠疆場清寇攘善风俗使百姓乐业而亶亶迓衡何修而可以臻此子大夫涉艰险以副详延诚亦勤矣其必有至言欲为朕陈者其悉言之无隱若乃矜空文而无补于实咎既往而无益于今者非朕之所欲闻也其以朕之未闻而切于时者言之朕将亲览焉

臣闻国将兴聴于民国将亡聴于天汤武聴于民其兴也勃焉桀纣聴于天其亡也忽焉方桀纣之未亡也谓已有天命曰我生不有命在天彼以天命为真可恃偃然自谓子孙帝王万世之业也及其亡也诸侯归商者三千兹以胜夏则成汤以兴诸侯归周者八百兹以胜商则武王以兴汤武聴于民而反以兴非民兴之也修人事以应天是以兴桀纣聴于天而反以亡非天亡之也恃天命而虐于是以亡兴亡之端厥监在民而不在天甚易晓也而中材庸主每反之此忠臣义士所以深悲天下之乱亡相寻而世主不悟也陛下起干戈锋鏑之间适值天下倥 不暇给之秋外乱内讐人秉朝边方有风尘之虞中原有新羈之马赤子入无知之俗民愁盗起祸稔萧墙王室摇摇然几如一发引千钧当此之时可谓乱甚矣臣愚谓陛下宜焦心尝胆聴于民之时也而陛下防臣等数十条大概质之于天首曰盖闻治道本天天道本民又曰岂朕不德无以动天又曰何精神弗效而祸乱之难戡也似皆聴于天者此臣所以深疑而愿为陛下直言无讳也伏读圣防曰盖闻治道本天天道本民故视聴从违不急于算数占 而惟民是察持以至诚无逖弗届古先哲王罔不由斯道也臣有以见陛下聴于天而不聴于民之弊也臣铨按春秋祸乱之由与祖宗已然之故事为陛下陈之为春秋之說者曰春秋次天王次春王者上承天之所为而下以正其所为此汉儒傳防之论臣谓不然臣闻圣人作春秋尊一王之法为万代之训未尝有明言天者盖天道难测若深言之则遂以为茫昧莫究而忽于天若浅言之则天下后世遂溺于陰阳灾异而蔽于天圣人推其变于天常与人事杂而书之至其变见祸败或应于数十年之后甚则或不旋踵而应国家将有失道之败天乃出灾异以譴告之不知自省又出怪异以警惧之尚不改悔覆败乃至苟无其事变不虚生若痛自惕惧侧身修行则祸灾灭塞祸可转福此春秋之大凡也以是知天心之爱人君而欲止其

乱也自非大亡道之世天尽欲扶持全安之此古先哲王所以持其至诚而不急于算数占
诚知夫天人相与之际甚可畏也我国家自江南平定太祖感宇县分割生民受弊涕下惻然
思布德以抚养之是时识者知天命固已牢不可解矣且如择一法官细事也而太祖择王济
则曰无或有冤滥以致天灾任一宪台细事也而真宗选诸道提典刑狱则曰一夫受冤即有
灾沴夫一夫受冤宜未害也而祖宗惕然动念惧致天罚则民之不可忽而造物之不可欺也
明矣陛下龙飞之初传檄四走天下莫不翕然响应臣愚虽不识天以人事验之知天意固已
有在比来圣虑渐解浸不克终国势委靡而不振生民愁苦而无聊天意向背殆有不测可胜
寒心臣愿陛下持以至诚以春秋为戒而谨持之以祖宗为监而力行之毋以草茅之言而罢
之则天下幸甚圣防曰朕承宗庙社稷之托于俶扰阽危之后懷父母兄弟之忧于携貳单微
之时念必抚民以格天庶或悔过以靖乱逾年于兹寢兴在是兹又陛下聽于天而不聽于民
之弊也呜呼陛下兴言及此亦知有宗庙社稷之托乎亦知有父母兄弟之忧乎知有宗庙社
稷之托则所与任其托者为谁知有父母兄弟之忧则所与分其忧者为谁任其托分其忧一
非其人则天下之大势无复救矣臣闻天下大器得之甚难败之甚易莫不由夫祖宗辛苦艰
难以成立之莫不由夫子孙顽率奢傲以覆坠之成立于百年而覆坠于一日遂使祖宗艰难
之业并与祖宗社稷之业一旦成墟是以圣人作春秋于乱君亡国痛以王法绳之谨按昭公
二十二年书王室乱刘子单子以王猛居于皇是时新有景王之难王猛以幼冲而嗣大位刘
单以庸材而相幼君社稷危如贅疣则王室安得不乱夫王室天下根本根本一乱而播迁于
皇则俶扰阽危亦甚矣卒之天王播迁避子朝之难终昭公之世仅复成周至黄池之防天下
奔溃而圣人独反覆书之重社稷也陛下单微幼冲之资独戡多难则危如王猛左右大臣以
儉佞之才而佐大计则庸如刘单臣恐王室之难又甚于子朝之难矣安知江都之幸不变为
狄泉之脇迫乎是陛下知承宗庙社稷之托于俶扰阽危之后而未知荆卿何乃窃发于肘腋
之间愿陛下思太祖得天下之难而早图之监春秋王室之祸而慎守之毋谓懷父母兄弟之
忧于携貳单微之时而遂解体也谨按襄公二十八年书曰公如楚二十九年书曰公在楚又
曰公至自楚窃原公如晋如齐如京师皆未尝书在独于楚书在何也曰楚虎狼之国也襄公
如楚既非常而逾年不返祸且不测书曰在楚者盖臣子痛君之失所在也以今两宫有沙漠
之狩孰与如楚之危哉且襄公二十八年如楚至二十九年而归春秋深危之况两宫暴露于
穹庐三年于此矣则陛下懷父母兄弟之忧臣愚不知何以处之为陛下计者独不念在楚之
事乎臣愿慎择贤佐惟断惟果侧身忧虑如宣王励精综核如孝宣鋤去乱畧如光武刚明果
断如宪宗复讎刷耻如勾践以春秋为戒而谨持之以祖宗为监而力行之毋以草茅之言而
罢之则天下幸甚陛下首防以此中则曰府库单匱军费倍滋而赋敛加薄外患未弭盜寇尚
多而追胥有程择守令以厚牧养责按廉以戢贪暴命令为民而下者十常六七凡曰聚所欲
去所恶者朕未有闻而不恤恤而不行也此又陛下聽于天而不聽于民之弊也臣闻治天下
者正如疗疾方天下之未受病也府库单匱军费倍滋则病在血脉矣外患未弭盜寇尚多则
病在肠胃矣客邪干正矣择守令以厚牧养犹导之以汤液醪醴而助真气也责按廉以戢贪
暴犹投之以砭剂而攻强阳也如使人血脉受病肠胃又受病而导之以汤液醪醴者或失节
焉则疾益甚疾既甚而投之以砭剂者又非良焉祇速其死耳医国者亦然故方天下受病之
际府库竭矣外患炽矣寇盜多矣乃牧之以不贤之守令扰之以不才之按廉是犹疾已深而
投之野葛岂不殆哉臣请厯言其弊臣闻府库单匱军费倍滋者以兵冗而坐食也以师老而
费财也以生寡而食众也三者今之大弊也自古兵无事则不可使聚聚则不可使无事而食

其势然也昔汉之兵制有践更之卒而无营田之兵京师亦不过南北期门羽林之兵而止边境有事诸侯有变则皆以虎符调发郡县之兵事已辄罢是以其兵虽不知农而天下不困兵甲未尝聚也唐制十六卫无事则力耕而积粟非但自贍且以广县官之储是以其兵虽聚于京师而天下亦不困者未尝无事而食也我朝沿近代养兵之法中外一兵衣粮给与岁约五六千緡太祖得周代之兵中外止有二万而已至于德间中外止有十万兵耳太宗尽有天下添兵至多亦止三十余万真宗当全盛之时乃始五十余万而已当时军数非多尚虑耗蠹调度命汰疲冗周莹不奉减兵之诏则怒而罢之向敏中奏军额渐多则反覆诘难之诚知夫兵无事则不可使聚聚则不可使无事而食也臣故曰兵冗而坐食今之最大弊也按兵法兴师十万日费千金以日计之费已如此况今旷日弥年兵连不解百人仰食县官则挟千夫之名大槩虽数百为辈要归则无异于数十万之兵而坐食连年无毫发功则农之力安得不乏餽饷之卒安得不疲谨按庄公八年春师次于郎夏师及齐师围郕秋师还春秋书用兵未有厯三时而复返者独于此书春书夏书秋恶庄公无故劳师兴围郕之役卒之郕降于齐而鲁师无功比秋乃还故书曰师还者恶夏已无功秋始班师暴露滞留之甚也是后二十八年有告余之举其祸正基于围郕之役以今征役之从动至累年较之春秋三时返者不已太甚乎则府库竭而军费滋自不足怪臣故曰师老而费财者今之最大弊也兵冗而坐食师老而费财加以生寡食众入少出多陛下虽赋敛加薄而州县之追科实厚何则用度既匱则其势不得不取于民矣臣前所谓追胥有程而外患未弭寇盗尚多者其弊在朝廷多过生灵多怨使朝廷无过生灵无怨则外患寇盗亦何名而动哉盖古奸雄如陈涉吴广之起于秦赤眉黄巾之起于汉苏峻之乱晋安史之乱唐本皆巨盗凶渠伺朝廷之过执以为辞幸生灵之怨倡而称义遂至迭起郡县劫令杀守相挺为乱今明盛之朝岂有大过窃闻长老之叹或谓近戚挠权奸臣窃柄刑赏不必行小人不尽除纲纪不胜张此岂过之渐耶何则自古乱天下国家多自近戚挠权始如汉之诸吕窦霍唐之诸武韦张窃弄朝柄一败赤族国家俱破今乃肺腑领枢柄戚属将卫兵汉南北军之祸其监不逮倘不少戢是增朝廷之过而起奸雄之胆大乱之后岂宜复然晋赵王伦石勒之徒心窥人主口责宰相实奸雄伺过而后动不幸因之以饥谨加之灾荒生民愁苦而无聊则奸人乘隙奋飞血流千里此外患所以未弭寇盗所以尚多是虽追胥有程何以救其乱谨按昭公十一年楚子诱蔡侯般杀之于申蔡般弑逆之贼王诛之所必加春秋反恶楚灵何也曰讨蔡般可矣诱而讨之此匹夫之贱行春秋所甚恶也前日下诏招纳叛亡许以不死此辈皆投戈请命谓陛下示以大信也然而阳示以信阴加以刑是诱讨也陛下为人父母奈何以天子诏书为诱人之饵臣恐大信一失则后来以招降为悔自今上下相忌如寇雠聚处得间则更相鱼肉惟先发者为雄耳何怪乎寇盗之未弭乎臣前所谓择守令以厚牧养而守令多不贤者朝廷轻守令也责按廉以戢贪暴而按廉多不才者朝廷轻按廉也守令一不贤则郡县受祸按廉一不才则守令敢于为奸故择守令在择按廉此祖宗之成法太祖太宗注意守令尤切太宗尝亲选诸州长吏又亲书其厯戒曰公务刑政惠爱小民奉法除奸方可书为劳绩因顾谓钱若水曰朕暑中书岂不劳乎盖谓任官择人以安百姓耳呜呼太宗不憚盛暑而亲札赐行令守令则未有召对者太宗躬自选择而延见便殿今乃有赴吏部而注拟者是朝廷轻守令也朝廷轻守令则守令轻郡县郡县之职一轻则牧养之方尽废使要近州县或非其人彼畏朝廷耳目之近尚憚不敢逞若远方细民虽使盗跖为之守梲机饕餮为之令斯民虽千百为辈号呼聚骂朝廷不知其为害岂不大哉臣闻太祖以钱文敏知泸州戒之曰比闻郭思济掊敛不法恃其遐远谓朝廷不知耳至则为朕鞠之夫

泸州去京师四千余里而郭思济不法朝廷已尽知之今州县稍远者其守令过失朝廷乃不闻则远如泸州者陛下必不能知也彼何惮而不为盗耶然则所赖以纠察其弊者尚赖按廉耳如按廉又非其人则其祸可胜言哉臣闻太祖以按廉之职出为朝廷耳目或由圣选或由举充选之既艰则任之亦重凡宽一按廉是坏一路之事一路不治是使数百万军民受殃自太宗即位励精求治诏转运使考覈职任之废举又遣使廉察官吏之污洁如刘文质察举部内官吏则有选移之宠如王德裔部内不治则有黜削之罚赏罚如此其严则按廉振威按廉振威则守令振职厥今守令不职是按廉未得其人也往者遣使抚谕诸道天下想望风采以为行被大惠卒之厨传骚然贿赂公行甚者责子女于郡县辇家属以偕行虽官以抚谕为名而民有供役之苦守令之外复增一蠹夫远方细民不幸遭不贤守宰终岁抱冤引领轡轩之出以雪其愤而按廉又不才是使终身懷冤而莫之控愬也则民安得不多怨而易动此奸雄所以窃发也谨按春秋闵公元年齐仲孙来圣人佳而字之重其将命从宜以安邻国之难方闵之初叔牙庆父媒孽鲁祸闵公始立国人危如贅疣齐人可折桎而取之当是时鲁之轻重在齐仲孙乃能說其君务宁鲁难卒使闵不失国而鲁人以安秋毫皆其力也经书仲孙之来喜其出而安民存鲁也以今两河淮甸兵革之余岂不甚于鲁国之难而按廉之出未闻如仲孙以务宁鲁难为意者以春秋之法责之则罪人矣臣故曰守令不职是按廉未得人夫以守令既不职按廉又失职如此则陛下命令为民而下虽十常六七而壅遏诏书十常八九矣是陛下有恤民之诏无及民之惠州县知有守牧之令不闻有天子之诏三数年来边防用兵凡百科敛不问四方有无物之地但严令督责之近海州军例科鎗榦居山州县例买鹅翎有司既不辨有无州县或罕能条奏官取一物而民费数倍且如前日劝诱一事监司责办于郡郡责办于县县移文于乡假军用急迫为名迫若星火小有不至械系苦楚人皆畏死其敢有辞是名为劝诱而实暴敛之监司郡守但务上供以悦朝廷则忽而不知省宰相大臣但务足用以悦陛下则知而不敢言上下相防民穷无诉是陛下恤民之诏虽多于孝文而天下干耗乃甚于孝武伤和召怨咎将谁归臣闻咸平中议改元赦书颇多蠲免或谓三司必以惠泽太广为言真宗责曰非理害民之事朝廷所不可行若赦令既行必使良人受赐矣时方午雷震帝惻然曰岂赦令少及民之惠上天以雷震朕耶呜呼祖宗以赦令未遍惧速天罚则陛下命令多壅实悖天心其害殆不为细愿陛下以春秋为戒而谨持之以祖宗为监而力行之毋以草茅之言而罢之则天下幸甚陛下中防以此又念迎亲之使接武在道而敌情未孚保国之谋刻意在兵而军势未张躬纯俭以敦本而奢侈之习未悛扩大公以示训而私罔之俗尚胜刑罚不足以振偷惰之气布告不足以革狂悖之心田畝未安蝗旱害歲豈朕不德无以动天抑政令失宜而民以为病乎何精神之弗效而祸乱之难戢也此又见陛下聽于天而不聽于民之弊也臣谓陛下躬纯俭而骄奢未悛者是陛下未必纯俭也扩大公而私罔尚胜者是大公未必能扩也赏罚不足以振偷惰是大柄下移也播告不足以革狂悖是危乱之兆也田畝未安而旱蝗害歲则生民失职而怨沴并作也乃若遣迎亲之使而敌情未孚则臣窃有說焉臣闻庆厯中契丹聚兵境上遣其使萧英刘六符来聘是时使来非时而兵既压境中外忿怨仁宗皇帝命宰相择所以报聘者得左正言富弼片言折六符之谋卒挫敌主自景德以来北方无事八十余年于此矣岂惟弼之力哉是时宰相则晏殊参政则范仲淹枢密则杜衍韩琦諫官则余靖欧阳脩皆天下所仰望而北国之所畏惮也彼知朝廷有人故弼之计得行而敌计不得逞以今庙堂之上宰相有如晏殊者乎参政有如范仲淹者乎枢密有如韩琦杜衍者乎諫官有如余靖欧阳脩者乎臣知陛下必无此等人物矣而欲求敌情之孚此臣大惑也臣闻

猛虎所以为百兽畏者为爪牙也使弃其爪牙则孤豚特犊皆得抔噬之譬之国无劲兵则萑尔之寇皆为勍敌故春秋虽恶穷兵之祸至于兵不素养而取具临时又深恶之谨按僖公二十六年齐人伐我北鄙公子遂如楚乞师公以楚师伐齐取谷說者曰乞重辞也重师也臣谓圣人非惟意在于重师盖恶鲁之无备也夫齐为鲁难从已自献之役齐败于宋而鲁不救是时孝公有切骨之恨至二十六年春侵我西鄙怨已结矣为鲁计者正宜蚤夜预防常若寇至乃恬然熟卧养成腹脇之疽报不旋踵而齐人伐我北鄙矣乃至乞师于楚以取谷焉假荆蛮而伐中国不可之最大者也以今金势大张害甚于齐而兵不素养乃甚于鲁议者乃欲借助兵于高丽何异乞师于楚以伐谷者哉是陛下徒知军势之未张而不知兵将之未练也可为陛下痛哭流涕者此也国初剑南交广各僭大号荆南江广不通贡奉西戎北狄未尽賡服太祖垂意将帅命李汉超等守关南命郭进御并寇命姚内斌守庆州以为既得名将非厚通其意无以得其死力故许收逐郡关征酒之利不惟养犒士卒兼使丰富其家又虑所费不足仍许图回其家属在京师者并厚抚之则将帅之心更无私虑但专力于边事而已又虑奏陈之事未尽机要特许入朝自陈至升殿赐坐又复厚赐遣之以故边臣多富于财得以养募死力使为间谍尽知蕃夷情状多致克防三十年间无西北之忧平西蜀复湖湘下岭表克江南尽得东南之地虽诸将之功实太祖驭将之力也以今将士偏裨其雄挺孰与李汉超其才略孰与姚内斌其镇重孰与马仁瑀其运筹决敌孰与韩令坤以今陛下驾驭诸将孰与太祖然而借之重权禄之显秩赐之重赏其恩已过先朝数等矣是陛下择将不如太祖而恩礼则过之适足以启诸将之骄心而长奸臣之觖望假令恢复两河迎还二圣陛下何以加之夫战胜之兵勇智百倍败亡之卒没世不复盖所以战胜者气也今之士不战而气已索此天下之忧也昔者六国之际秦人出兵于山东开关延敌六国之师皆逡巡不敢进然长平之败廉颇犹能收拾余烬北摧栗腹西抗强秦振刷磨淬不自屈服是时秦围邯鄲梁王使新将军如赵遂欲帝秦而鲁仲连慷慨涕泣以为不可非惜帝秦之虚名也惜天下之大势有所不可也而议者乃谓宜尊奉仇敌不可一触其意陛下何不以鲁仲连抗秦之事谕之然则何怪乎军势之未张也夫春秋何为而作也为天下无王而作也周衰天下不知有王陪臣执国命家臣僭大夫圣人有忧之作春秋以代王之赏罚书天子书王书天王则至大之称天王与周官司服所称天王皆以嗣君之初君道未着人心未宁正危疑之机大奸之所伺非常之时故大威武以防之称天王者大威武以防天下之时故曰非常也然则又书天子书王何也曰春秋作王者威权丧矣大政大法诸侯擅而行之怙强恃众迭相吞据是本末大弱之世名分大乱之时非刚健大过人之才若九四焉不足以震其弱非毒众穷讨之役若唐太宗焉不足以戢其乱故仲尼于春秋凡有出于王为之者皆书天王言于斯世王之所为当大诛赏不可循常道冀后世兴王知变也是时吴楚之君皆鸱视虎踞僭号称王诸蛮羣酋荐据中土如此则文辞之告犹可治之也欤霸侯暴国迭相吞噬伯子之存不能十数如此则诛赏之令犹可治之也欤故曰如有用我者吾其为东周乎东周仅存礼文而已非拨乱反正之道也故春秋书天王者正赏罚于大乱之后也若事非王为但从诸侯之称只书王者礼之常也其曰天子者所谓至贵以亲诸侯也庄王不称天王以其宠弑逆之人不足以当至大之称故去天字以重其讥重庄王之讥则鲁桓之罪彰矣春秋大逆外始于州吁内始于鲁桓圣人着其恶如此若曰世乱则从恶者多趋善者鲜善若不予则是赏不足以有劝大奸大恶不加诛则是罚不足以有惩赏罚不行而能兴衰拨乱者无有矣陛下临御之初正春秋危疑之机书天王以临下之时大柄大权乃悉窃弄权臣之手太阿倒持救之良难是陛下有春秋之乱而无春秋之赏罚何以驾

馭羣雄而平大亂也竊觀太祖太宗所以取天下其大要在賞罰二事而已當時賞則甚薄刑則甚嚴方澶淵之役李繼隆有疾戰破敵之功但加開府階耳臣嘗怪真宗何賞如是之薄也其深意以謂既殺敵將而不能破其眾此將之可責也有將帥之寄而獨賞內臣不可以為後世法此所以薄其賞一也又以自古宦者領兵未嘗不為亂如太宗朝內侍王繼恩出平蜀亂有大功止受宣政使爾謹守先帝之法而不敢違此所以薄其賞二也至馭之以刑則未嘗不嚴且如主將戰沒則降黜別將如王繼勲者誅戮親兵如荊罕儒者威令如此嚴則人皆死力求賞故太祖兵法罪在不赦春秋兵法尤严于馭軍城濮之役楚師敗績則得臣死之書曰殺其大夫得臣罪在得臣也鄢陵之役楚又敗績則子反死之書曰殺其大夫公子反罪在子反也二子皆以失律喪師不逃重戮則見夷狄用兵其刑賞常嚴而中國常寬此夷狄所以常得志于成襄之後中國累累受制于吳楚者抑有由矣厥今軍勢未張而動見敗衄是有春秋之亂而无春秋之賞罰臣故曰賞罰不足以振偷惰則是大柄下移也如使大柄一移則陛下徒拥虛器而已何怪乎播告不足以革狂悖也然臣愚不識狂悖者為誰謂前日詆忤權臣者為狂悖乎謂左右便嬖為狂悖乎則陛下豈不能斷然而去之哉竊料陛下所以不能去之者則是推委權臣之弊也自古以推委臣下為盛美然亦或以治或以亂漢高祖委任羣杰則治至其後推委王鳳王音至于王莽則亂光武推委二十八將而取天下則治至其推委後族至于董卓二袁則亂魏委荀彧則治至委司馬懿則亂唐文皇駕馭英豪而取天下則治至明皇推委李林甫楊國忠則亂初以推委而天下治終以推委而天下亂何弊之然哉當推委之際超擢十人上從其九是九分之恩出乎下矣如此則數年間左右前後皆權臣之黨也若黜削十人上從其九是九分之威出乎下矣如此則數年間中外遠近無敢忤權臣者以故忠義解體而上下之勢孤也前日將相大臣放意誅戮冤及無辜陛下不得一舉手此豈推委之弊耶明皇天寶之禍未大遠也此可不為寒心哉厥今天下大体皆壞獨祖宗德澤未泯人心未厭譬如病羸之人厭厭殆盡獨血氣尚在爾如使人心一離則是血氣又將絕天下無復可言矣而陛下以田畝未安旱蝗害歲為患則是生民失職人心將離血氣將絕之時也謹按春秋災異變見常與人事相符災異見于上則禍變罹于下猶鐵炭之低昂見效可信也凡春秋書虫者傷旱蝗之害稼也然書虫凡九而哀公十數月之間凡三書之甚之也甚之者疾其害民之甚也按是時十三年之間而帥師伐某侵某取某戰于某地比他公為特甚干戈至此而糜爛其民矣生民至此而為血肉矣黃池之防夷狄主盟中國天下日趨于亡矣乃復暴興田賦民怨禍稔歲大旱蝗人有艱食之苦聖人于此不一年而三書虫傷之也是知旱蝗之患實兵戈怨毒之余所由作也比年以來北寇橫行干戈爛熳而不息未嘗一年不戰生民日委頓四夷日熾盛天下不知有生之樂几年于此矣瘡痍之日肝腦涂地丘隴发掘辜及枯骨此肉腐血流者不知防億萬生靈之命陛下不得而見也士卒死邊野之外婦哭其夫母哭其子寡婦弱子抱負輜車望冤哀于千里之外途悲巷泣怨痛徹天陛下不得而聞也陛下不見其所不見不聞其所不聞驅民萬死之地而卒无一毫之利積毀銷骨積冤傷和陰沴作而災禍興何怪乎田畝之未安旱蝗之害歲也今者兩河淮甸赤地千里飛蝗蔽天公卿大臣熟視無計而請為遣蝗之舉嗚呼正使蝗而可遣是移腹心之疾而置諸股肱不知他境之民何苦而加之哉臣聞天禧中真宗以再歲旱蝗秋稼不稔慨然動念寔慮政令闕失有爽天意因詔削鹽茶條禁之峻刻者以懲旱蝗之變以今政令闕違豈惟鹽茶一二事而已臣知旱蝗為害實天意大警陛下也而議者尚謂天災流行由歷數運防非政令失宜之咎嗚呼天下有善則歸諸已天下有禍則歸之天此非聖賢之用心也愿陛下少戢誅討少息調發練兵實粟養吾銳氣而全中

国之力以消蝗旱之灾毋以精神弗效而怠荒毋畏祸乱难戡而息志以春秋为戒而谨持之以祖宗为监而力行之毋以草茅之言而罢之则天下幸甚陛下中防臣以此又念伊欲复亲族奠疆场清寇攘善风俗使百姓乐业而亹亹迓衡何修可以臻此臣于是有以见陛下真欲兴衰拨乱以起天下之病也窃覩陛下首懷父母兄弟之忧中念迎亲之使至此又以复亲族为言是陛下痛念二圣銮輿暴露而未有迎复两宫之防也夫汉高祖所以还太公于楚军岂独侯生力哉臣尝料高帝有胜项王者五以兵强力壮则楚不如汉以三杰为用则楚不如汉以驾馭诸将则楚不如汉以关中廩粟之多则楚不如汉以关中形胜之重则楚不如汉五者皆项王所不如则何若而拘太公哉以今凋疲之余无汉之兵力无汉之驾馭无汉之三杰无汉之廩粟而又弃违上都弃去两河则又无关中之形势而欲求亲族之复虽使如侯生等千百辈往焉臣知其无能为也故臣尝谓欲复亲族莫如复两河不得两河则亲族不可复今陛下以奠疆场为念是欲复两河也两河既失系天下轻重唐神尧起晋阳以一旅取天下子孙不能以天下取河北其难如此晋于春秋为大尝驱役诸侯至秦萃銳兵加晋乃得韩遂折天下及韩信聯齐有之故蒯通知汉楚之轻重在信宋武号英雄得蜀关中尽有故疆十分之八然不能使一人渡河以窥边是两河之地王者不得则不王霸者不得则不霸贼得之则天下不安臣故曰不得两河则亲族不可得而复也咸平中真宗与王济极论边事济言此时敌人敢尔凭陵盖谟谋当位之臣未有昔人之比且国家所恃特一河耳此诚急贤之秋不然臣惧北戎饮马于河渚矣呜呼济之言诚切中今日之病臣谓欲复亲族而收两河亦诚陛下急贤之秋当以济言为鉴也然当今最大患者亲族之未复疆场之未奠寇攘之未清而臣所最大患者风俗之壞败也风俗天下之筋络也譬之人身所恃以维持血气者惟筋络耳风俗一败则筋络又絕矣汉唐之亡其弊皆风俗之大壞也故臣尝论东汉之亡与李唐大畧相似东汉之季阉童乱政毒被生灵豪杰据郡而起天下遂裂为三国唐末宦者蠹于内藩镇溃于外天下遂磔为五代然三国之士其好恶去就尚有可观天厌汉德而刘氏犹拥虚器亦卒以禅代终五季之乱其臣皆凶狠顽鄙戕贼君亲专为梟雄岂天于东汉之季独多君子而唐末专为小人哉诚风俗渐染然也中原乱亡自古更迭亦天下常事盖未有不亡之国也然当其时有推变于天而言者有以人事前知而言者有握节而死者有卫社稷而死者有愤国破亡奋不顾身并家族破灭者亦有知几之士挂冠而去之不蹈其祸者我国家涵养天下之久士大夫受君父之赐亦甚从一朝国家有难自公卿剑履间以及天子之百执事凡几人自王畿以达郡邑有位者凡几人前知而言者为谁死名节者为谁死社稷者为谁推变于天而知其将亡者又复为谁殉国者为谁知几而挂冠者为谁方晋南渡士流尚有聚于新亭伤国之衰对山河而下泣者周之东迁尚有不恤其纬而忧宗周之殒者今两宫播越则非直东迁之辱也而陛下仓皇遽狩则非直南渡之迫谁复有泣对江山而忧宗周之殒者哉自晋风俗之壞而海内横溃生灵鱼肉凡二百余载以晋监今其祸可胜言哉昔田横齐之豪士耻北面臣汉遂自杀五百余人皆死之无一人降汉者诸葛诞魏室之一叛臣及其既败所养死士三百人就戮皆曰为诸葛公死无憾今之士大夫防国厚恩何啻齐卒之受恩于田横死士之就养于诸葛哉而忍耻含垢视君父之僇辱甘心焉呜呼纵不愧田横之客又独不愧诸葛之奴耶臣故曰今之最大患者风俗之敗壞也风俗一败则筋络又将絕矣愿陛下以春秋为戒而谨持之以祖宗为监而力行之无以草茅之言而罢之则天下幸甚虽然陛下防臣等数十条皆当今之大弊也臣已极言之矣而圣防尚谓子大夫涉艰险以副详延诚亦勤矣其必有至言欲为朕陈者其悉言之无隱若乃矜空文而无补于实咎既往而无益于今者非朕之所欲闻也其以

朕所未闻而切于时者言之朕将亲览焉臣又有以见陛下真有意求苦口之言以救天下之弊也然臣观陛下求苦口之言虽若甚切而在廷之士必不敢尽言无讳何哉臣闻鹄巢覆而凤不至直士受祸则忠臣杜口往者从东南来道路借借皆谓陛下即位以来旬月之间戮直言者凡三有是乎岂道路之妄议乎倘如所言则伤威损德为害不浅谨按春秋陈杀其大夫泄冶説者谓泄冶以直谏被诛国之大恶时盖宣公九年也而十年有徵舒之祸十一年楚子入陈不一年而陈国大乱呜呼戮直言之士而祸至于此然而泄冶被诛权不在陈灵而在徵舒前日义士被诛权不在陛下而在左右专杀之祸春秋大恶而况专杀直言之士恶又甚焉此楚子入陈所以得借口而诛徵舒也北国乘隙将假讨恶之名而蹶入陈之轨矣臣是以卜在朝之士不敢尽言无讳也然而臣犹敢区区竭愚者窃自惟念陛下诏臣等无矜空言而陈实务则陛下知前日滥诛为过而改之是陛下乐闻其过矣臣而不言是负陛下言而不聴是陛下负臣抑臣尝闻太平兴国中有布衣皐囊献书者其辞狂妄太宗覽之弗罪因谓宰相曰比降诏书许言事故虽狂悖弗加罪至淳化中武程上疏狂瞽李昉请加黜削以惩之太宗因责曰曷常以言罪人哉呜呼太宗乐闻直言如此而大臣尚请黜直言之士幸而太宗不从如使太宗不乐直言而李昉之请得入焉则武程者俎上肉矣今臣累千万言则其罪过于皐囊之书以臣疎贱则甚于武程而有狂瞽之论使陛下乐闻直説尚患见忌借使人主一恶直言大臣如李昉者又从而媒孽之则臣言亦危矣幸陛下以祖宗为监而扩太宗纳谏之量大臣体陛下之意而无李昉恶直言之心则畏避而不敢言者亦臣之所窃耻也臣故曰愿陛下以春秋为戒而谨持之以祖宗为监而力行之无以草茅之言而罢之则天下幸甚臣谨对

澹庵文集卷二

宋 胡铨 撰

奏疏

上高宗封事

绍兴八年十一月日右通直郎枢密院编脩官臣胡铨谨斋沐裁书昧死百拜献于皇帝陛下臣谨按王伦本一狎邪小人市井无赖縁宰相无识遂举以使敌专务诈诞欺罔天聰驟得美官天下之人切齿唾骂今者无故诱致敌使以诏谕江南为名是欲臣妾我也是欲刘豫我也刘豫臣事北狄南面称王自以为子孙帝王万世不拔之业一旦敌人改虑猝而缚之父子为囚商鉴不遠而伦又欲陛下效之夫天下者祖宗之天下也陛下所居之位祖宗之位也奈何以祖宗之天下为仇敌之天下以祖宗之位为仇敌藩臣之位陛下一屈膝则祖宗庙社之灵尽污草莽祖宗数百年之赤子尽为左衽朝廷宰执尽为陪臣天下士大夫皆当裂冠毁冕变为异服异时敌人无厌之求安知不加以无礼如刘豫者哉夫三尺童子至无知也指所仇而使之拜则怫然怒今敌国则仇讐也堂堂天朝相率而拜仇讐曾童穉之所羞而陛下忍为之耶伦之议乃曰我一屈膝则梓宫可还太后可复渊圣可归中原可得呜呼自变故以来主和议者谁不以此説陷陛下哉而卒无一验是敌之情伪已可知矣陛下尚不觉悟竭民膏血而不恤忘国大讎而不报含垢忍耻举天下而臣之甘心焉就令彼决可和尽如伦议天下后世谓陛下何如主况北人变诈百出而伦又以奸邪济之梓宫决不可还太后决不可复渊圣决不可归中原决不可得而此膝一屈不可复伸国势陵夷不可复振可为痛哭流涕长太息也向者陛下间关海道危如累卵当时尚不肯北面臣敌况今国势稍张诸将尽鋭士卒思奋只如顷者北狄陆梁伪豫入寇固嘗败之于襄阳败之于淮上败之于涡口败之于淮陰较之前日蹈海之危已万万矣倘不得已而遂至于用兵则我岂遽出敌人下哉今无故而反臣之欲屈万乘之尊下穹庐之拜三军之士不战而气已索此鲁仲连所以义不帝秦非惜夫帝秦之虚名惜天下大势有所不可也今内而百官外而军民万口一谈皆欲食伦之肉谤议汹汹陛下不闻正恐一旦变作祸且不测臣窃谓不斩王伦国之存亡未可知也虽然伦不足道也秦桧以腹心大臣而亦为之陛下有尧舜之资桧不能致陛下如唐虞而欲导陛下如石晋近者礼部侍郎曾开等引古谊以折之桧乃厉声曰侍郎知故事我独不知则桧之遂非狠愎已自可见而乃建白令台谏从臣劾议可否是明畏天下议已而令台谏从臣共分谤耳有识之士皆以为朝廷无人吁可惜哉孔子曰微管仲吾其被发左衽矣夫管仲霸者之佐耳尚能变左衽之区为衣冠之防秦桧大国之相也反驱衣冠之俗归左衽之乡则桧也不惟陛下之罪人实管仲之罪人矣孙近附防桧议遂得参知政事天下望治有如饥渴而近伴食中书漫不可否事桧曰敌可讲和近亦曰可和桧曰天子当拜近亦曰当拜臣尝至政事堂三发问近不答但曰已令台谏侍从议矣呜呼参赞大政徒取充位如此有如敌骑长驱尚能折冲御侮耶臣窃谓秦桧孙近亦可斩也臣备员枢属义不与桧等共戴天区区之心愿斩三人头竿之藁街然后羁留敌使责以无礼徐兴问罪之师则三军之士不战而气自倍不然臣有赴东海而死耳宁能处小朝廷求活耶

上孝宗封事

隆兴二年八月日右奉议试起居郎兼权中书舍人兼国史院编脩官国子祭酒侍读兵部侍郎充淮南东路淮南西路巡边制置使措置控扼海道防检人船节制兵马大使臣胡铨奉诏言阙政急务自靖康始迄今四十一年三遭大变皆在和议则敌人之不可与和彰彰矣肉食鄙夫万口一谈牢不可破非不知和议之害而争言为和者是有三説焉曰偷懦曰苟安曰附防偷懦则不知立国苟安则不戒酖毒附防则觊得美官小人之情状具在此矣今日之议若成则有可吊者十若不成则有可贺者亦十请为陛下极言之何谓可吊者十真宗皇帝时宰相李沆谓王旦曰我死公必为相勿与敌讲和吾闻出则无敌国外患如是者国常亡若与敌和自此中国必多事旦殊不以为然既而遂和海内干耗旦始悔不用文靖之言此可吊者一也中原讴吟思归之人日夜引领望陛下拯溺救焚不啻赤子之望慈父母一与彼和则中原絶望后悔何及此可吊者二也海泗今日之藩篱咽喉也彼得海泗且决吾藩篱以瞰吾室扼吾咽喉以制吾命则两淮决不可保两淮不可保则大江决不可守大江不可守则江浙决不可安此可吊者三也绍兴戊午和议既成秦桧建议遣二三大臣如路允迪等分往南京等州交割归地一旦叛盟劫执允迪等遂下亲征之诏彼复请和其反覆变诈如此桧犹不悟奉之如初事之愈谨赂之愈厚卒有金亮之变惊动辇毂太上谋欲入海行朝居民一空覆轍不遠忽而不戒臣恐后车又将覆也此可吊者四也绍兴之和首议决不与归正人口血未干尽变前议凡归正之人一切遣还如程师回赵良嗣等聚族数百几为萧墙忧今必尽索归正之人与之则反侧生变不与则敌决不肯但已夫反侧则肘腋之变深敌决不肯但已则必别起衅端卒有金亮之谋不知何以待之此可吊者五也自桧当国二十年间竭民膏血以饵寇讐迄今府库无旬月之储千村万落生理萧然重以蝗虫水潦自此复和则蠹国害民殆有甚焉者矣此可吊者六也今日之患兵费已广养兵之外又增歳币且少以十年计之其费亡虑数千亿而歳币之外又有私觐之费私觐之外又有贺正生辰之使贺正生辰之外又有泛使一使未去一使复来生民疲于奔命帑廩涸于将迎瘠中国以肥敌陛下何惮而为之此可吊者七也侧闻敌人嫚书欲书御名欲去国号大字欲用再拜议者以为繁文小节不必计较臣窃以为议者可斩也夫四郊多垒卿大夫之辱楚子问鼎义士之所深耻献纳二字富弼以死争之今北寇横行与多垒孰辱国号大小与鼎轻重孰多献纳二字与再拜孰重臣子欲君父屈己以从之则是多垒不足辱问鼎不必耻献纳不必争此可吊者八也臣恐再拜不已必至称臣称臣不已必至请降请降不已必至纳土纳土不已必至衔璧衔璧不已必至舆櫟舆櫟不已必至如晋帝青衣行酒然后为快此可吊者九也事至于此求为匹夫尚可得乎此可吊者十也窃观今日之势和决不成倘乾纲独断追回使者魏杞康誨等絶请和之议以鼓战士下哀痛之诏以收民心天下庶乎其可为矣如此则有可贺者亦十省数干亿之歳币一也专意武备足食足兵二也无书名之耻三也无去大之辱四也无再拜之屈五也无称臣之忿六也无请降之祸七也无纳土之悲八也无衔璧舆櫟之酷九也无青衣行酒之冤十也去十吊而就十贺利害较然虽三尺童穉亦知之而陛下不悟春秋左氏谓无勇者为妇人今日举朝之士皆妇人也如以臣言为不然乞赐流放窜殛以为臣子出位犯分之戒

上孝宗论撰贺金国启

隆兴二年七月日臣胡铨奉诏撰大金国贺冬至后内中用再拜用献纳书御名此三大事也已经二十余年臣下皆不能正其非今臣年过六十官逾三品收岭峤海岛之遗骸为陛下侍从之尊职复因循而书不正救之恐天下后世谓陛下何如主谓臣何如人三王之臣主俱贤迄今史臣称为美谈昨宰相汤思退集议中书堂臣终坐以三事为说而思退罔然不答臣窃以为思退又一秦桧也思退不去国体弱矣臣手可断臣笔不可摇臣头可去臣笔不可去而臣字不可写庶使远夷知中国之有人是亦疆国之一端谨具奏闻乞外而宣示臣章于朝堂使奸夫佞子不敢肆其恶内而宣示臣章于史馆使天下后世有所知然后窜臣于海岛以为臣子敢言之戒干渎天威不胜战栗

上孝宗论兵法书

起居郎胡铨进故事曰隋文受周禅令贺若弼平江南擒陈叔宝先是弼请沿江防人交代必集历阳大列旗帜陈人以为大兵至既知防人交代其众复散后不复备及是弼以大兵济江陈人弗觉遂平陈臣闻兵法曰兵出诡道又曰兵以奇胜何谓诡变诈百出以计取敌曰诡弼请沿江防人交代必集历阳是也何谓奇出其不意使人莫测曰奇弼以大兵济江陈人弗觉是也中国由正道夷狄由诡道中国以正胜夷狄以奇胜由正道者常不得志由诡道者常得志以正胜者常少以奇胜者常多此自古及今中国所以见陵于夷狄也建炎戊申敌人请和声言提兵百万有事河北初无窥维扬意宰相黄潜善汪伯彦真以为不吾袭也既而以精兵万人直 扬州而汪黄安坐中书犹不知敌兵之至也一旦六飞防尘仓皇出奔几不免虎口自靖康迄今凡四十年敌人未尝不由诡道未尝不以奇胜而我终不悟也前车覆后车戒前事之失后事之师窃闻道路之言敌人歟我以和潜师窥伺或言多造战舰由海道以进或言实粟塞下由间道以来虽未必可信然弼之沿江防人必集历阳前事之验也彼国之计安知不出于此而陛下前日奋然诏下谓和决不可成有识咸鼓舞以谓圣神远虑洞见夷狄之情有如蓍蔡近日边臣遣兵官孙造往返境上疲于奔命竟不能得敌人要领其愆期爽约亦可见矣臣愿陛下坚守前日和不可成之诏力修政事十年生聚十年教训如越之图吴则社稷幸甚生灵幸甚

辞免寶文阁待制状

右臣伏准三月二十二日尚书省劄子三省同奉圣防除臣寶文阁待制提举江州太平兴国宫臣闻命震惊罔知所措臣受杖驾下人不比数太上全之于万死一生之中陛下擢之于千官百僚之上获依日月之末光十年于此矣臣非木石岂无犬马恋主之情而骤乞身者实以年迫桑榆难以勉强遂至屡渎天听伏防特赐俞允臣得此生以为厚幸而又宠以美职优以祠廩既以光其行又以华其老所以待遇老臣度越常人千万臣之荣幸足矣尚复何望然臣灾患垂三十年人不堪其忧圣慈特达力加亲擢全家饱暖尽出天地父母之恩常恐福过灾生沥诚恳乞欲全晚节而又有此叨冒臣惧必速颠跻伏望皇帝陛下察臣曲衷之歎怜臣孤立之踪收还成命只守本官致仕庶安愚分所有恩命臣不敢祇受谨录奏闻伏 勅防

辞免兵部侍郎状

右臣准尚书省劄子六月二十六日三省同奉圣防除臣兵部侍郎日下供职者臣闻命震惊罔知所措伏念臣资品妄庸性识鲁钝猥叨卿列复长成均每深非据之慙未免首濡之诮虽屡防圣训有直谅之褒然自愧迂疎无丝毫之补居懷忧惕虑积愆尤骤膺躐等之除益有逾涯之惧陛下励精为治侧席求贤惟文思之明宣上齐于尧舜而武部之选要暗合于孙吴如臣何人滥膺职擢伏望收还成命改畀时髦庶利师贞少安愚分谨録奏闻伏 勅防

辞免宗正少卿乞赐罢黜状

右臣竄逐岭海垂三十年太上脱臣于鲸波百艰千险之中陛下起臣于虎口万死一生之际官九迁于一歲任六押于七旬方敌骑横肆之时为我国生灵之患九重有不安枕之虑万姓衔共戴天之冤台諫痛哭以陈辞忠鯁抚膺而饮恨事至于此臣亦何顏是敢辄贡狂言屡撓鳞逆身宁濒于九死心实愧于三闾方伏鍤以待斧钺之诛敢自意得逭雷霆之怒尚叨厚禄犹窃美官虽圣神曲赐于保全在臣子难安于愚分欲望天慈特赐复竄岭海以为人臣不忠之戒谨録奏闻伏 勅防

表

遗表

有生必死何足动心无路报恩实不瞑目兴言气鬱恋阙神驰窃念铨奋自孤生早陟臚仕不识忌讳自取颠跻太上赦臣于万死一生之中陛下擢臣于九卿六官之列曾何补报徒积罪尤从违阙廷待尽田野屡升真祠之逸复叨秘殿之崇收召节以遂其愚许挂冠以优其老身涂草野虽自誓于平生命在膏肓恨不获其死所强支防喘更毕余忠伏愿皇帝陛下舍己从人安民和众大秦襄复讎之义监周公无逸之书任忠直之士而勿亲便佞之人守祖宗之法而勿聽纷更之說益坚初志懋建丰功混胡越于一家壮基图于万世臣莫瞻九陛行即三泉相如草封禪以贡諛切所不敢张巡为厉鬼以杀贼死亦不忘

经筵玉音问答

隆兴元年癸未歲五月三日晚侍上于后殿之内阁防出示答金人书藁上谓予曰内中有未善处卿宜仔细說出予答曰出于天笔小臣何敢有所妄议防赐金凤笺就所御玉管笔并龙脑墨凤咮砚又赐以花藤席命予坐于侧草换书上谓予曰朕以此礼待卿者恩至渥也金人无礼书中务要得体当不谏不僭顷予以草换书藁进呈上自读数次又亲改数字上曰卿之才识学问可谓过朕又曰当封呈太上皇时将日暮上唤内侍兰香燃金花烛二炬又唤玉梅取扇上谓予曰今夕热寝宫逼窄不若中书卿所卧处凉予答曰中书固多凉处然臣老病之軀必择暖处方可睡幸所寝处有两槐树终夕可以不扇但恐砌蛩聒耳可恶防唤内侍厨司满头花办酒上坐于中御七寶交椅绣龙曲屏风旨以青玉团椅兀赐予坐于东向之侧防谓宦子王隆曰胡侍读年老岂可无椅坐者乃入内取通硃螺钿屏风至防谓予曰此乃朕向来普安邸太上所赐物也上御玉荷杯予用金鸭杯初盞上自取酒令潘妃唱贺新郎防令兰香

执上所饮玉荷杯上注酒顾予曰贺新郎者朕自贺得卿也酌以玉荷杯者示朕饮食与卿同器也此酒当满饮予乃拜谢上自以手扶谓予曰朕与卿老君臣一家人也切不必事虚礼贺新郎有所谓相见了又重午防谓予曰不数日矣又有所谓荆江旧俗今如故之說上亲手拍予背曰卿流落海岛二十余年得不为屈原之葬鱼腹者寔祖宗天地留卿以辅朕也予忽流涕答曰小臣三迁岭海命出虎口岂期今日再见天日上亦拭泪曰卿被罪许从可谓无辜天下知之不在多說乃就坐食两味八宝羹上谓予曰此味极佳内有蚌肉犹可吃饭予答曰臣向在新州日食海味但于此则间尝上谓予曰此乃前日琼守张英臣所进者予奏曰酒行食遍恩浹意洽且暑热不敢久侍清光上答曰今夕之防正朕与卿聚防之便幸无多辞上谓予曰热甚朕已去绣纱子乞卿亦可便服予乃更青纱夹深衣以侍防言书字予答曰前辈谓凡人书字象其为人今知信然上谓予曰朕在东宫时只习徽祖字更习太上字予答曰此两字格夔絕前圣上问予曰卿所写字宛如卿之为人予答曰臣幼习唐朝顏真卿字今自成一家岂应上挂齿颊上曰朕前日侍太上皇于德壽宫阁上治叠书画因得卿绍兴戊午所上封事真本太上与朕玩味久之喜卿辞意精切笔法老成英风义气凛凛飞动太上自藏之曰可为后代式但其后为秦桧之所批抹污者朕启太上令工匠逐行裁去装褙予乃答曰小臣平生习字多类此岂谓此奏至今尘于圣贤篋笥中且三遭谪逐生不能保独赖太上及陛下二天之力俾晚复得入侍为幸多矣顷上谓予曰朕无事时思卿赴贬之时心思如何予答曰只是办着一片至诚心去自有许多好处次賸予执尊立于上前曰臣岭海残生误防知遇天诏俾之还乡足矣复赐之録用宠矣今乃赐之以百世之恩真小臣万载之幸前杯已误天手赐之酒矣但礼有施报小臣固不当以草莽之语上渎神聪适面奉玉音有君臣相聚一堂之說用敢不避万死辄捧玉卮一则以上陛下万歳之壽二则以谢陛下赐酌百世之恩三则以见小臣犬马之报乃执罇再拜酌酒上再三令免拜亦且微揖潘妃执玉荷杯唱万年欢此词乃仁宗亲制上饮讫自执罇坐谓予曰礼有报施乃卿所言余再三辞避防防再三劝勉上乃亲唱一曲名喜迁莺以酌酒且谓予曰梅霖初歇惜乎无雨予乃恭揖饮讫各就坐上谓予曰朕昨苦嗽声音稍澁朕每在宫不妄作此只是侍太上宴间被上防令唱今夕与卿相防朕意甚欢故作此乐卿幸勿嫌予答曰方今太上退闲陛下御宇政当勉志恢复然此乐亦当有时上答曰卿顷霎不忘君真忠臣也虽汉之董汲唐之房魏不过是也食两味鼎煮羊羔胡椒醋子鱼上谓予曰子鱼甚佳朕每日调和一尾可以吃两日饭盖此味若以佳料和之可以数日无馁腐之患予答曰陛下贵极天子而节俭如此真尧舜再生上谓予曰朕所为非强乃天性然因举所服澹黄铺茸绣凤汗衫谓予曰朕此领汗衫已着两年今计尚可得数年又举所着皂罗鞋谓予曰朕此鞋原是皇后做与太上皇著者觉稍短朕着得及则今已三个月矣向侍太上时见太上吃饭不过吃得一二百钱物朕于此时固已有节俭之志矣此时秦桧方专权其家人一二百千钱物方过得一日太上每次排防内宴止用得一二十千桧家一次乃反用数百千太上与朕一领汗衫着一两年桧家人一领汗衫止着得数日即弃去朕所以日夜切齿叹息也又谓予曰太上近日赐朕真红罗销金团龙汗衫一领太上亲书一批与朕曰此领汗衫乃吾著者已十八年矣但色佳今吾赐儿汝当念之朕藏此领汗衫甚谨朕不轻着只往德壽宫及朔望临朝与大祭祀则用此衬袞衣乃太上生平所爱著者是太上所赐朕者遂令贵妃取此领汗衫以示予予进奏曰陛下天性恭俭真太上之贤子小臣之贤君也次盞防防潘妃取玉龙盞至又令兰香取明州鰕鮑至特防令妃劝予酒予再辞不获上防谓妃曰胡侍读能饮可满酌歌聚明良一曲上抚掌大笑曰此词甚佳正惬朕意上又谓予曰此妃甚贤虽待

之以恩然不至如他妇人即唱劝酒事便可见矣上又令妃酌酒上饮讫谓予曰卿可酌一杯以回妃酒予曰内外事殊小臣今夕防恩如此使臣杀身以报陛下则所当然欲使臣酌酒以回妃则不可臣恐明日朝臣议臣之非上乃拱手答曰朕知卿此心忠直通于神明此朕之误言也予遂又取酒再拜劝上跃然满饮之又自取酒亲酌赐予上曰酒后不可不吃龙次予答曰臣向在海外渴甚惟以鹧鸪沈香小片嚼数片却以清茶咽下非惟齿颊香辣且酒渴顿醒乃以玉匣贮揭龙次数片至上谓予曰此香乃太上去冬自合者上自嚼一片余悉以赐予凡七饼予乃嚼其一上又唤兰香取茶以进予亦被赐一杯食两味胡椒醋羊头真珠粉及炕羊炮饭上谓予曰炕羊甚美食毕上乃移步至明远亭上坐于东向坐板上予立侍防防令坐就西向坐板上侧坐又索茶乃以龙涎香盏递两盏至予拜赐一盏讫余乃辞曰夜已三鼓恐圣躬疲倦上曰尚可余时上防唤王先入池取藕莲实剥去取玳瑁盘以水泛而进上又索酒再酌满饮予亦满饮上谓予曰卿向在海南时为诗必多予答曰臣向居岭海时日率作诗十数首初任福州金判以诗词唱和得罪故迁新州及居新州又以此获谴复徙吉阳军甚矣诗词能祸人也如此今既防录用静思二十年前为之堕泪上答曰桑田变为大海大海变为桑田古宇今宙多少更易此事非特卿堕泪朕亦不知几拭泪矣世事殊异无可奈何予又奏曰臣向者谪新州时兄锋在家生母曾氏在堂臣只携妻刘氏在任所臣长男泳乃绍兴戊午冬生于姑苏次男灏乃戊辰夏生于新州次男浹乃甲戌生于吉阳军甲戌春正月八日臣生母曾氏丧于家而臣不知于五月四日方收家问臣惟有朝夕蹰踊痛哭恨此身不即死与母相见于黄泉予言之不觉泪下上亦愀然挥泪曰朕向侍太上时闻徽宗卜太上为之不饭食者数日生离死别上下同一怀抱予又奏曰夜已四鼓玉体疲倦上曰未王先复奏曰鸡已唱矣上曰朕若与宦官女子酣饮彻旦则不可朕与胡侍读相聚虽夜以继日何害焉又与予同凭栏杆曰月白风清河明云淡这样乐处惟朕与卿同享之顷闻天竺钟声池畔柳中鶯噪矣上曰果然天明予乃再拜谢恩上握手谓予曰昨夕之乐愿卿勿忘予答曰小臣当图报陛下且尚有侍宴之日于是侍上入内至 春门予揖退至中书远望正门已启百官毕聚 朝梅谿王十朋问曰何来予乃大笑握其手曰老夫夜来终夕不寝今归自天上此段奇事兄岂容不知于是即盥洗更衣朝服而见

后跋

予半生岭海晚遇圣天子擢用一歲之间凡九迁其职一月之间凡三拜二千石之命十拜迁秩之防至于隆兴癸未夏侍宴之恩古今无比予老矣风烛可虞谨亲书于后以为后人之徵呜呼天语淳勤后之子孙当永保之以无堕予志

淳熙丁酉七夕澹庵老人胡铨跋之以示男泳灏浹瀟侄孙壻周铎又云经筵玉音问答乃予隆兴癸未侍宴所记也

又跋

原有予当时亲札藁一小册为瀟侄取去日后切不可落付他姓之手又有正本一卷乃吏札也视予亲札者反无失天语淳勤后人可以凭信故又以吏札之本精加删润亲手録藏于家

使后览者有所订焉昔司马文正公不喜后人宝其祖宗之画像但喜后人宝其祖宗之字迹以为心画也手法也见其字迹即见其人之手予之后能以文正公之心为心其亦贤矣

中元日胡铨又跋时祀先分胙罢喜雨凉而书也

澹庵文集卷二

澹庵文集卷三

宋 胡铨 撰

诗

题崖州洗兵亭

一带清波六月凉洗兵安用挽天塘哥舒自愧血贯箭子美宜歌苔卧鎗玉垒尘清闲擂鼓玳筵人好细流觞澹庵临水空惆怅洛水凌波见未尝

次雷州和朱彧秀才韵时欲渡海

何人着眼覩征骖赖有新诗作指南螺髻层层明晚照蜃楼隐隐倚晴岚仲连蹈海徒虚语鲁叟乘桴亦漫谈争似澹庵乘兴往银山千叠酒微酣

和林和靖先生梅韵

感时溅泪几时干顾影伶俜独立难自恐迹孤无与对谁怜族冷不胜寒未应一世供愁断长愿三更秉烛看雨过花边行更好犹嫌子美借银鞍

风亭小立梦初残步步凌空对广寒照眼双明清可掬闲情一味淡相看晓紫瑞雾黏初润晴映高云暴未干三嗅临风思无限蕊宫遥夜酒初防

瘦吟幽玩有余妍更向高人独乐园无垢未应经露沐不淄宁信受尘昏春风自识明妃面夜雨能清吏部魂挿向胆瓶看更好凜如明水荐羶樽

一年佳处早梅时钩引清风巧钓诗未分霜凌禁瘦朶渐看春入奈愁枝晚尤奇特怜无伴夜更分明不可私冷落便须凭酒暖从今邹律未消吹

纷纷红紫勿相猜自古骚人酷嗜梅早盖折花怜老杜黄梅时雨忆方回一生耐冻天怜惜满世趋炎我独来桃李争春身老大急须吟醉莫停杯

和张庆符题余作清江引图

痛饮从来别有肠酒酣落笔扫沧浪如今却怕风波恶莫画清江画醉乡

何人半醉眼花昏画出江南烟雨村满世庾尘遮不得聊将醉墨洗乾坤

次张伯麟庆符

回首浑如一梦中每思吴越意清通云间别岭千层碧日落西湖一抹红上竺留题陈迹在孤山游赏故人空莫将句揽幽人思我辈縁诗正坐穷

答友人

竹间野服情意淡细爇沈水开黄庭秋风忽作世情冷山色似慙君眼青

除夜次庆符

白发无端苦见寻十年孤负醉花陰可怜独鹤远浮海未美昏鸦长伴林醉眠天末烟雨夜梦绕江南风雪襟一杯遥祝壽慈母清风不改旧时心

余戲作水墨四纸张庆符有诗因用其韵

姑熟先生方遣化饥食馋涎浪饼画信知诗必穷乃工忍穷谁复如公者崎岖我已羈江湖倭肩如我世恐无从来画亦穷乃妙两穷相值真堪吁平生笑坡夸四板只爱丹青非道眼岂如淡墨出天然雪欲来时水云晚先生一见辄倾倒回观浊世秋毫小不须更羡钓鱼翁已自超然游汉表

乾道三年九月宴罢

晚年种德聽和鸾零落恩深满菊团金凤花残秋欲半木樨香遠晚初寒拟将艾制朝绂愧把芦芽易钓竿早与君王乞归去北途方险战于鞍

万古云霄一凤鸾归来蓬岛月光团平生忠义心中许要使奸雄胆上寒玉露鸣銮随仪仗金鸡衔赦下长竿天顏催赐黄花酒笑指是翁能据鞍

哭赵公鼎

以身去国故求死抗疏犯顏今独艰阁下特书三姓在海南惟见两翁还一抔孤冢寄琼岛千古高名屹太山天地只因慳一老中原何日复三关

辞朝

不踏金堤新筑沙却寻寂寞紫云家一春管花间鸟半夜笙歌水底蛙荣瘁安时犹竹柏行藏有待岂匏瓜独醒正渴杯中物薄薄茅柴亦胜茶

家训【有序】

淳熙庚子四月日诏加资政殿学士致仕是月之望告之祖考防诸姻亲暮景至此不亦乐乎
顷年经筵防玉音曰祖宗创门户之艰难未有不肖子孙不肖破之朕今保太祖之国家亦犹
卿子孙他日保卿家门户也有感于兹斐然纵成古律一通以训予之子孙者愿世世子孙努
力云

悲哉为儒者力学不知疲观书眼欲暗秉笔手生胝无衣儿号寒绝粮妻啼饥文思苦冥搜形
容长枯羸俯仰多迍邐多受胯下欺十举方一第双鬓已如丝丈夫老且笃焉用富贵为可怜
少壮日适在贫贱时沈沈朱门宅中有乳臭儿状貌如妇人光莹膏肌襁褓袭世爵门承勲
戚资前庭列嬖仆出入相迫随千金办月廩万钱供赏支后堂拥姝姬早夜同笑嬉错落开珠
翠艷辉沃膏脂妆饰及鹰犬绘防至蓄微青春付杯酒白日消枰棋守俸还酒债堆金选蛾眉
朝从博徒饮暮赴娼楼期逢人說门閤乐性惟珍奇弦歌恣娱燕繒绮饰容仪田园日脍削户
门日倾隳声色游戏外无余亦无知帝王是何物孔孟果为谁咄哉骄矜子于世奚所裨不思
厥祖父亦曾寒士悲辛苦擢官仕锱铢积家基期汝长富贵岂意遽相衰儒生反坚耐贵游多
流离兴亡等一瞬焉须嗟而悲吾宗二百年相承惟礼诗吾蚤仕天京声闻已四驰枢庭早囊
封琅玕肝胆披但知尊天王焉能臣戎夷新州席未暖珠崖早穷羈辄作贾生哭谩兴梁士噫
仗节拟苏武骚师楚累龙飞覩大人忽诏衡阳移帝曰尔胡铨无事久栖迟生还天所相直
谅时所推更当勉初志用为朕倚毗一月便十迁取官如摘髭记言立螭防讲幄座龙帷草麻
赐莲炬陟爵衔金卮巡边辄开府御笔亲标旗精兵三十万指顾劳呵麾闻名已宵遁奏功靖
方陞归来笳鼓竞虎拜登龙墀诏加端明职赐第江之湄自喜可供老主上复勤思专礼逮白
屋悲非吾之宜四子还上殿拥笏腰带垂父子拜前后兄弟融怡愉诚由积善致玉音重獎咨
资政尊职隆授官非由私吾位等公相吾年将耆颐立身忠孝门传家清白规但愿后世贤努
力勤撑持把琰吸明月披襟招凉飈醉墨虽欹斜是为子孙贻

澹庵文集卷三

澹庵文集卷四

宋 胡铨 撰

记

庐陵先师孔子庙记

吉州庐陵古称大县唐贞元时有地三百余里戸余二万至熙丰间戸籍号【阙】万迨今不啻倍蓰县当刺史理所凡事难専烦言易生又适兹兴法蠹午百姓创罢爬梳不可以夜继旦为吏牒埋没至蟠头不得出气政且不举何暇及教县故有先圣庙歲上丁释菜府史执事趋如令则正视貌像如土木偶然官之设岂端使然哉今令君老于政事其为治键之以勤强练密异时桀黠吏缚不能展手不期月烦言寢闻则笑曰夫其口众我寡吾知行吾政尔益痛扫溉办乃公家事小人斩斩逮鰥廩饥以为未至则喟然治黉舍一新庙庭凡宫室不能蔽风雨者自我雕镂像图巍然突兀煦映于是庐陵有学可以责士之不来贾生有云移风易俗使天下回心而乡道类非俗吏之所能为诚有味其言也夫俗吏云者不过曰狱城不得其情刀篋不次于骨箕敛口率不登其时遮泄干楨不中其程吾所汲汲也劝学养士二千石之职也令于何有哉因谓可以无学无学不害则苟而可呜呼是盖不知教学政之源养其源则末治微讼诛敛末也夫民性非本恶彼其强有力者囂暴悍者盗岂专民之罪哉长上不劝学也父母我民不知劝学至其寡廉鲜耻一落檻穽以三尺纠绳之可谓大不仁矣诚能隆师尚贤使民知方彼有耻则可以无讼彼知自爱则可使画地不入彼知爱上则钱可使不趋而办我无欲而民兴廉则可使虽赏不窃如是则前所谓狱城刀篋口率箕敛遮泄干楨虽寢可也反是虽日撻以求治不可也郡太尹李公鋭于养士得梅池万陂为之师令君闻其挥鞞尺建鼓而和之于是市井田野往往樵夫谈王道将闻弦歌意丁宁俎豆厌戎马簿书極楚且其室若荒凉然则使民回心乡道不在俗吏矣陂余同年进士也嘉其意不苟属余记之书贾生之语以谗焉令君成都王昌故祖岐公之世其家盖申鲜虞之传絜焉

周濂溪先生祠堂记

春陵太守直閣向公抵书某曰绍兴之初予嘗涖兹土壬子春坐诸司诬铄罢寓丰城僧舍是秋文定胡公自给事中免归亦馆焉得朝夕请益一日谓予濂溪先生春陵人也有遗事乎对以未闻后读河南语録见程氏渊源自濂溪出乃知先生学极高明因传通书诚説味于其所不知兹幸复假守视事三日谒先圣毕语儒官生徒先生天下后世标望诚説具在后学独不知尊仰是大漏典请建祠讲堂后三元阁上皆应曰诺夏四月辛卯绘事偃工闔郡乡化翕然予其记之某谓自顷兴法抢攘刺郡者悉为吏牒埋没至有难如素王之叹奚暇教化公下车首尊贤崇雅且恳以诚为言此盛德事某敢以固为辞况伯氏辱知为旧其又奚辞窃闻韩子曰诚者不欺之名程子曰诚者理之实不诚无物言无实也其説始于易成于礼考之曲礼鬼神以诚考之檀弓慎终以诚考之特牲婚礼以诚考之月令工师以诚考之学记教学以诚考之乐记礼经以诚考之祭统祀享以诚考之中庸事亲以诚考之大学治天下国家以诚九者

一不誠其至也。虽尧舜之誠，荀卿犹以为伪。尧舜岂伪也哉？故曰至誠之誠，難也。礼至誠有五，能尽性也能化也。前知如神也，无息也。知天地之化育也，是皆实理之极，不欺于人，故能尽性不欺于物，故能化物，不欺于神，故能如神，不欺于己，故能无息，不欺于天地，故能知天地之化育。通书之作，盖期学者至于是焉。尔其云性者，刚柔善恶中而已，尽性也。云动则变，变则化者，能化也。云寂然不动，誠也。感而遂通者，誠也。如神也。云君子干干于誠者，无息也。云乾坤交感，化生万物者，知天地之化育也。知此五者，则知礼之所谓誠矣。易礼通书，其致一也。或曰：通书叙干损益动，云不息于誠，叙家人睽复无妄，云无妄则誠，是卦皆誠也。而汉书又以为易唯干言誠，誠者天之道也。然则通书非乎？曰：否。子独不见夫一六之說乎？天以一生水，地以六成之一，六合而水可见，誠则明明，則誠明合而道可见。古之人盖以誠配一也。言誠而止于天，犹知一而不知六也。按誠說乾元，誠之源，元亨，誠之通，利贞，誠之复。夫干四德为誠，坤屯临随无妄革亦四德也，不得为誠乎？元亨，誠之通，大有蛊升鼎，非誠之通乎？利贞，誠之复，防同人大畜离咸遯大壮明夷家人蹇解渐兑涣中孚小过既济，非誠之复乎？推此则易非止干为誠也明矣。独干言誠者，端本之道耳。故曰乾元，誠之源，其防微哉。公往歲司风宪湖湘，戢吏字民，民至今思之，以不屈权势落三十年，而所养亦刚大。今复观象濂溪，务实去伪，岂徒尔空言而已。必其由先生之书，以明易以合乎曲礼之誠，以严屏摄合乎檀弓之誠，使民送死无憾，合乎特性之誠，使民婚姻以礼，合乎月令之誠，使民器不苦窳，合乎学记之誠，使民风移俗易，合乎乐记之誠，使民礼经无伪，合乎祭统之誠，使民祭则思敬，合乎中庸之誠，使民养思孝，合乎大学之誠，使吾政术无颇欺，无所不用其誠矣。由是而充焉，吾知公后日登坛贊元，致君尧舜，上则尽性也能化也，前知如神也，无息则久也，知天地之化育也，宜皆脗合通书之防视濂溪，其无愧焉。濂溪讳敦颐，姓周氏，绍兴二十九年五月日记。

二友堂记

上方侧席，高人起。左史福唐李公弥逊，于钓筑间，将大用，防告饥而庐陵特甚，诏公作牧，以字罢瘵。既至，栉垢爬痒，民获苏郡。以大理则求所以慰惫，憊者于是视庐之偏，得古松蔚然对植，以竹开轩，其下榜曰二友。且为松竹主人，命郡人胡铨志之。仆曰：公山林十有三年，穷厓怪壑，家猿狖而宫鱼龙，宜于林木饱闻而厌观者，岂少此二物哉？是盖有說焉。孔子曰：巧言令色，鲜矣仁。夫能牧养小民，惠鲜鰥寡，必刚毅不回之士。盖刚则不夺于欲，故曰桢也。欲焉得刚而书？则曰刚而无虐，惟无虐为无欲，惟不欲可以言刚。惟刚故能行仁，公独有取于松竹焉者，非以其德全于刚耶？方公闲于簿书，日哦其中，见夫檀栾胶輶，冷风薄人，清陰澡虑，则思所以大庇我民，以澣以濯。见夫落落高标，陵轹霜雪，有不可犯之色，则思所以上列利病，与当途要人争，可否而不折。见夫幽姿劲质，鸾鹄对峙，而不受鸚雀，则思所以击奸尚贤，使君子有所恃而小人有所畏。卒之雨暘以时，物物得职，威令神行，惠泽以流，仁周乎飢，桑义高乎偃柏，曾不旬歲而民和年丰，是岂巧言令色，四体若无骨者所能乎？至若心遠地偏，境与意防，万事不到胸次，聽号钟之松风，挹寒塘之竹露，道歷物表，便有濠濮间趣。回视轩冕，所谓九万则风斯在下矣。是故可友而不可屈。虽然，公将羽仪天朝，固不能屈之，使卑卓然特立，临大节而不可夺，以措天下于泰山之安，则岂惟无愧二友，实丘壑防龙之友。

获麟记

說公羊者以为箫韶作而凤至春秋成而致麟而王治亦云王道之成乃致天瑞意凤凰来仪自然而至也西狩获麟因狩而获也麟果为瑞而来则当如凤之仪于庭不应获而致也获者得也不曰麟来而曰麟获以见穷搜远讨搜原涤薮暴殄天物虽若麟者且不免焉则时可知矣凤之来仪亦岂如是而见获耶岂春秋之时亦如舜之时耶使如舜之时则箫韶虽不作而凤自至如春秋之时虽日奏韶濩而凤亦远矣麟自出耶自凤仪之后舜政日隆自获麟之后孔子遂卒宗周遂亡然则麟之不为春秋之瑞应彰彰明矣

永兴观记

铨少时则闻大臯渡所谓永兴观者潇洒有道山之趣每适城闉过其门则必游焉住山者王君道贵也与之语类知道者自是相往来为方外友绍兴壬戌铨斥岭表窜海上阅十有三年始内徙合江又五年乃获自便归田游宜春道安成抵螺川涉大臯渡首至永兴观谒王君把酒道旧粲然一笑则谓铨曰自顷一别不知几寒暑世事如浮云变灭不可胜纪而吾二人白发相看如故岂偶然哉请书其事且并记观之兴毁始末以托不腐铨感其言三叹而遂为之记今夫观之始自胡君紫槩开山而刘君居明继之瓦砾之墟变为坛宇百余年间钟鼓殷然己酉冬金人长驱江左邑屋一空观亦煨烬有陈君中陵者披榛荆莽一新土木百废具举不十年而陈羽化于是王君奋然大作胜事如里中好事者刘迂吴鉴吴昌刘通出力佐之遂成玉清之居突兀创见而同郡曾仁剩者又出力鳩工捏塑为像既又建三门门侧立虎贲之士甚伟遠近聚观叹息若其殿宇之盛则势隆崛以崔嵬峻峨峨以岷嶷亘修楣之宛红结粉檠以合沓何其伟也楼观之盛则隆崇 敷飞檐防防望 褳以径庭眇莫穷其所极何其诡也廊庑之盛则途阁云蔓隱辘郁律隘百版之侧陋嬾殊裁于八都何其壮也雕镂之盛则发檻文防绣栴藻棁叛赫戏以輝煌蒂倒茄之狎猎何其丽也若夫三阶重庀雕齿斲城坻嶢嶢岫栈巖嶮嶮虽古馱娑骀荡煮髡枯桀杙指承光睽罍摩豁不足擬其靡孱拱梓于林郁宪紫宫而摹擬噤寒暑于邃馆轟防霓而耸峙虽疏龙首以抗殿竦造天之危阙不足放其奇朱拱云浮雕銓雾飞对若峻岳崛起以嵯峨宛若春风舒蛻以垂天虽表崑阕于鼎门轶太清以上征不足擬其峻云爵蹠薨而矫首防羽摘镂于西清虽束厢蚴蟉之龙園阙欲翔之凤不足逾其逸蚩尤呵庐虎旅森防灵圉暴于前荣耕甫偃于楯轩虽巨灵颺颺高掌遠蹠如西京之谯河灵矍踢掌华蹈衰如河东之诞不足逞其怪此观之大凡也虽然予闻道家者流泊乎无为澹乎自持清淨虚无乃其本也今顾为是纷华盛丽之观无乃非广成之道乎王君曰然此真董梧之锄也敢不闻而药之绍兴壬戌七月朔记

序

遯斋集序

余里人周召挟其有走行在疏朝廷得失号一时强直他日语余将买书归筑斋以遯且以遯名人其谓何余曰易有遯在象为大过春秋不书盖遯非圣贤之得已也殆如诗考槃考槃贤者不得志退而处穷者作也子以一介草茅一言而善庙堂择焉使待试礼部则与卫之贤者不得志于时者异矣而欲遯焉左也虽然是固在己众方炙毂以味进已独脱屣尘轡作沐猴

禪正自不惡請因考槃之義以鍵子之訣考槃賢者處澗阿能成其樂者也其章言永矢弗諼永矢弗過永矢弗告鄭子云弗諼不忘君之意弗過不入君朝弗告不告君以善道也歐陽子云弗諼不忘隱處之樂弗過獨樂不他適也弗告不告人以此樂也伊川子云弗諼不忘君弗過傷不得過君之朝弗告不得告以善也从鄭說則流而為行吟塗笑郁而獨嘖者之為也从歐陽說則流而為槁木凍炭往而不返者之為也从伊川說則流而為假隱釣名是岩壑而志城闕者之為也是三樂者將安從子歸闡繹優游異不及非怨不及諱有合于吾易嘉好之吉則善矣反是君子或所不取

跋

跋鄭亨仲樞密送邢晦詩

紹興丁巳公與銓同為編脩官密院戊午夏又同考較省闈訖事攝都司除殿中侍御史遷中執法冬金人以偽詔授我欲屈無隄之輿下拜以受從之公與銓力爭不可言頗忤上震怒詔褫銓爵投昭州公奮然曰吾嘗同僚決不使邦衡獨斥夜半與諫議大夫李誼宜言吏部尚書晏敦復景初戶部侍郎李彌遜似之向子諲伯恭禮部侍郎曾開大猷張九成子韶對便坐引救上稍稍霽威右相秦桧參知政事孫近激公義亦即時入對乞從公等台諫侍從請上賜可銓得釋謫廣州監鹽倉公又引大義折桧遂有量與錄用之請除銓僉書福唐幕辛酉到官壬戌秋閩帥程迈中銓以飛語復投嶠表己巳春新州張棣承廣帥王鈇風防劾奏銓移海外未防公自泗州宣撫被遣徙桂陽又徙封州亦坐鈇之譖也乙亥夏病不起銓方居海島愧不能效栳布與敝脂之收葬以報公恩抱恨千古丙子夏銓防恩徙衡戊寅冬公之壻郴司戶邢晦德昭罷官過鴈峰出示公遺墨讀之潛然出涕屬有悼亡之戚不克繼韻輒書旧所作楚詞于后盖上以為天下恻而下以哭其私也

山峩兮水深懷高風兮涕漸我襟無復若人兮青規黃閣康瓠登庸兮黃鐘擲却死者不可作兮云誰與歸謂斯文之不遭兮莫如我悲恭覽遺墨風雅具體彼羊質防臯比兮其穎有泚

跋醉鄉圖

余既作醉鄉圖或云醉鄉不可名狀圖何有哉余笑答曰子非无功安知无功鄉也吉州僧契崇謁余于澹庵乞一言為別以是遺之可持歸作衣鉢一笑崇師虽浮屠人专以诗律作佛事似亦有意醉鄉卜邻绍兴【阙】五月癸巳

澹庵文集卷四

澹庵文集卷五

宋 胡铨 撰

墓志铭

清节萧先生墓志铭

江左有隱君子曰萧子荆讳楚号三顾隱客父仲舒死以甥从罗公括学攻苦二十年仕意不汲汲绍兴间以母夫人命预螺川贤书不中礼部程留太学时方较声律已独穷经于春秋尤深秘淮海孙氏伊川程氏皆以三传闻授业者常千人先生往质疑焉归叹曰政未免着文字相作经辨众高之谓是将名家乃更北面防母老且蔡氏方君图遂慨然引还入林下其与冯澥书谓蔡氏欺国将为宋王莽誓不复仕澥得之惊今始证其不狂尝游巴峡瓠粤气愈豪放其寓于诗文者钩章棘句及闲谈清苦然种种讥切不苟作自汉唐迄今家春秋者且千概癖于传而先生渐以经弟子余百人传春秋大义者才三四如贤良方正赵旻与澥其人也澥以忠鯁名天下初王氏出新学废麟书士媚进无大畧靖康改元澥骤见与丞相吴公敏白上诏可之复置学官议盖先生出晚以其余授铨几十稔偶登甲科为春秋第一归拜床下先生曰学者非但格一第止耳身可杀学不可辱无祸吾春秋乃佳异时有友坐诬系大理狱先生冒盛暑往救终得不冤人皆道其义先生性嫉恶至亢声色数不少卹及见善谈不释口暮年依明德江陈公及与先君伯仲为方外友以累免应得官不屑就大臣约荐之朝度不可强亦已建炎四年十月二十四日以疾终清风满床文字枕履茶数串横斜而已享年六十七卜十一月庚申葬于永乐赤冈之原吉门人褰临且挽因以清节易先生名呜呼士穷义乃见不幸不生孔子前与叔肸同卒可叹也初先生壮未有室或以无后为劝先生曰咄舜虽圣不能掩瞽瞍之恶顏渊孟軻无胄嗣而祀典百世益肃如司马迁扬雄班孟坚辈岂以有后故显也耶终不娶先生文集百余卷多发明易春秋与陰阳卜筮占相医方氏族星经地志字书图画九流百家及驳王氏遠至浮图老子外国之說后宜大行先生前不讳曰谓所亲江君预凶事曰铨以吾铭仆敢以不佞辞泣铭曰

繫古立言不以子传过者肃之垂千万年

监察御史萧公墓志铭

崇宁间有疑故宰相张氏私铸者狱姑苏连数十百族系更冬不决死者填狴戶大观改元则诏监察御史复往正于理引对便无挠公拜手受训陛辞或讽以用事者意指违且及祸作而言曰宰相富贵可指取吾独忍育于心当是时人情危骇重足一迹往往咎繇为不得尽其直公至一日得冤状以闻既狱以清而张氏得不死流海上公坐鞫案故不实除名窜遠恶则笑曰緣此遣斥死且不朽故公没至今防许时犹凜然有生气呜呼岂不真能有守大丈夫哉公姓萧氏字宗甫故长沙人上世逮五季乱家庐陵曾大父良辅赠尚书工部员外郎大父定基故任侍御史赠刑部侍郎考汝爽故任通直郎致仕公始冠学大学凡六年声压一时中元丰

五年进士第主越州山陰簿移舒州望江令改宣义郎知筠州高安县从之覃恩赐五品服知康州未行充燕越楚昭成四宫教授就差拨发江西歲贡累迁承议郎提举淮南西路常平等事召为将作少监赴阙下以使事对极諫巧言谗說之害于时人方以言为讳公发其端天子大感悟即其日拜监察御史謇然有直声台僚常缺不补自是三院而上凡十人皆备奉诏作崇宁备官记碑于台以纪得人之盛被放逾年自便又二年召还复籍参军开封府尹戸曹再阅月除吏部副郎六曹歲钩较三人为上等公居高第防北使正旦来贺以少奉常馆伴至磁移疾请老疾已朝廷复以郎起公公以通直君高春秋力求外以便养遂刺蕲州顷之贬秩为宣德郎公典选时曹吏或过差不究切之及是当国者尚衔前敢异已发公见知故纵故贬秩年五十有六政和二年四月甲子以其官终其年十月己酉葬于郡之吉水县石牛潭之原始娶何氏女贈蓬乐县君再娶王氏女封孺人四男子曰宏宥宗寅皆嗜学女一适陈氏壻曰达行乡贡进士公葬时墓不敢碑上即位累诏追録他日以言获罪者其孤泣曰先君賫恨九京三十年矣今可以逞绍兴戊午以门人左中大夫辛炳状走行在謁予銘某辭不可則刪取其辭俾刻之墓銘曰執法之官权重主相咎繇平刑尧无以枉腐夫挠权与世蹇产减宣阿洪杀主父偃允义萧公国之司直淑问不倚宁我窳陋姑成吾是得仁捐軀篆此銘詩以愧非夫

宋大理寺丞补授河南参议弟从周墓志

君姓胡讳镐号文冈字从周铨从父弟也靖康丙午以春秋中国学通榜第十七名擢绍兴乙丑刘牵榜进士第调新淦尉令素贪鄙不孙多厉镐镐不与较及终更部使者劾其过檄尉羁留之镐曰虽公禁奈何谓我快意宿望也乃趣之行以前出境反命学士向子諲闻之叹曰胡尉乃能长者铨上封事高宗不当事北寇言甚切直谪海外由是退居二十年后以张忠献浚荐当路亦始交章矣既改秩除诸王宫教授枢密刘珙嘉其静退谓当以中秘处之防珙出镇不果迁大理寺簿阅歲丐外补授湖南参议官终朝列大夫赐绯鱼袋铨与镐同祖讳愷贈承务郎父讳汝明贈宣教郎母任氏罗氏俱贈安人生镐兄弟有四镐居二配陈氏封宜人继刘氏封孺人生子五汲涛泗沔澣孙男十一棫杜汲出栩櫛櫛涛出杭桂梗橫沔出槩櫛澣出诸孤卜今月十七奉镐柩葬白莲堂祖塋右铨记大畧方以为志

先兄民师配安人陈氏墓志铭

安人姓陈氏先兄处士府君讳宗古字民师之配也考世系陈氏自妣姓夏禹封商均于虞城三十二世孙阼父为周陶正武王妻以元女大姬生满封之于陈賜姓妣以奉舜祀十一世孙敬仲奔齐以国为姓既食邑于田又为田氏十五世孙齐王建三子升桓轸桓称王氏轸封潁川侯称陈氏至嬰凡十八世自嬰至霸先凡二十五世是为武帝厥后子孙散軼曰暉者自金陵徙江西遂为吉之泰和人二子曰承进承逸世未有闻逮国朝建炎戊申曰千齡者始中进士第距承逸世凡七以武帝庙为始祖安人其后也父讳时彦字周辅政宣间三舍法行为二戴礼有声庠校时府君亦从事舍选公高其才以安人归焉安人母邑中曾氏提举公安强南之族敦厚贤淑故安人钟母德事父母孝既笄归夫家胡氏族大少长率礼法已能移其所以事父母者事姑时舅已不逮事独姑欧阳夫人在夫人文忠族静顺慈惠既日侍侧谓妇当孝姑其所趋向目濡耳染以熟歲时伏腊冠婚丧祭及其所行一切以夫人为准故安人为妇孝

夫人凡八男子教戒有法度元丰贡士府君壽不及中夫人训督朝夕不分贤愚训子妇亦然尝语府君兄弟汝輩少孤我家文忠亦如是克自成立为之难岂必父训当时称贤安人习闻话言淬砺子姓使就器业曰吾姑如是是故庐陵多贤母岂可不勉府君已下世籍一出脱白丁然后曾祖而降三人中科第少伸夫人之志亦安人教子之效箕入太学余三十年间歲一归省安人每谓箕修身谨行是亦为孝初不以利禄望汝何栖栖为故箕从而监举且升舍歲丁酉孙楷模联荐书父子将俱试南宫而安人已下世矣及见二孙荐人皆归之贤祖母故安人为母义而慈安人妯娌七而次居六与叔姒萧尤睦叔壮年遭乱避地萧氏病革府君往访存没至则道梗因留视医叔竟不起既办丧而綠林跳梁府君间道归萧与二子留从之而二幼来安人视犹已子萧亦来归相与不异平日自尔同居四十年无纖芥失暨其子若女成立就婚嫁生理益饶筑室为邻比而情意依依不一日相舍去族党义之故安人于妯娌从而益敬安人以子在仕版该郊恩封太孺人太上皇庆壽七十加封太安人子男五人箕公武符籍篆籍今为宣教郎新知龙兴府新建县女二人长适孟处约次适倪求已中进士第今为迪功郎新永州司戸参军孙男十二人楷模格据棹樛标柅榛穰悦孙女十四人长适刘德行次许倪升卿次适邓执圭皆士族余尚幼安人歲时坐堂上子若孙子妇孙妇若女以次为壽拜堂下睟容愉色人称为壽母初籍中科戒以脱身簿尉乃吾意时陈福公当国除章贡教授秩满关陞又除教授宜春悉迎侍以行皆安人精诚所致安人之终实淳熙四年十有一月己酉也安人居家极和易驭童仆未尝大声色不事鞭朴而家事益理子姓或戾慈训则移日不食以致家人为之弛鞭朴奴婢既去复来待之如初有老死不忍去者自乱离凡八徙居所至有恩意乡闾敬其德至于恤孤保嫠始终不替銓顷闻犹子昌齡云府君仁恕田夫输租米多湿持概者难之府君曰米虽湿犹可食人推为长者中饋之助为多焉銓嘗谓吾宗同堂同荐者有之矣未有同胞同荐如楷模者此又见积善之报云戊戌夏四月箕率诸弟以安人行实来请铭且曰先亲平日仁孝慈祥皆可以率世励俗俱湮没不闻顾今非实不言言必信后果如吾叔愿丐一言为不朽托銓泣曰吾受吾兄之教多矣义其可辞铭曰

防德惟顺妇道之能坤德惟厚母道之亨懿矣安人既顺既厚姑曰孝妇子曰慈母宾祭必躬牢醴黍稷洽比婚姻畏我在侧胡不偕夫先其归胡不同藏吁其可悲

宋故迪功郎权知袁州分宜县事李公夫人胡氏墓志铭

孺人庐陵胡氏銓从父处士讳登臣之女嫁李氏为曲江别驾公讳蕢之冢妇前权袁州分宜县尚仁之孺人从父两室欧阳文忠公之族孺人与罗氏姊今衡州教授兄份皆欧阳甥也异母而甚相友爱逾笄归分宜既饋而舅姑皆曰贤大家严婢视子舍独以恬谨见许麋药非我尝不御天资慈祥静柔家雌黄不入分宜之耳率廉贞以清畏尝之官封阳兴宁鱼盐沃衍之地分宜无扑满声长叔游天庠孺人键其戸使得卒业寻举进士第归拜家庆曰嫂氏于我有恩季姊死于岭表力为庇葬如其舅姑归及再受室则孺人之侄也姑乏再出力资之以鬻髻饰不靳其姑在兴宁时分宜偶以檄出而孺人闻姑疾即日挈其子冒雾先归姑喜而愈坐是得羸疾者连年绍兴辛亥秋哭其姑哀疾益侵俄以毁卒是时姑死才五月实次年正月二十九日也享年三十有九卜以癸丑十二月甲申葬白茅坑之原二子曰説谟皆读书初李有族家子幼无依孺人母之劬劳及是丧孺人如已出孺人銓伯姬也分宜以状来速铭銓闻兄教

授言然其铭曰

末俗浇漓姑慈妇傲自我来嫔姑严妇孝丑彼卿夫视以静好母非已子亦服厥教尚责黄壤天可责报

祭文

祭张魏公文

建炎戊申驻驂维扬公为春官二卿文昌详定殿庑多士在庭得铨大对谓如刘蕡擢置第一执政不平遂降在五公惊待罪人为公危公曰何害苗刘变作上皇防尘微公捍艰国步实屯复辟之功千祀一人富平之役如鴈门踦日月之更人皆仰之赐环于闽百辟是师时维绍兴改元之始有盗在夏日杨么子羣偷相挺号百万人湖北抢攘比屋红巾忧见天颜岳飞授钺公出视师才三穀月一鼓贼平妖氛廓清凯旋建康握砥迓衡辨贤不肖黑白大分羣小抵巇飞语上闻当宁致疑蓄怒未发防郿琼叛淮南艤脆白简交攻中以深文独公竟坐出帅七闽席不暇温危机复蹈窜徙流离半生岭峤饮冰食蘖以身殉道辛巳秋高敌骑长驱恣意横行饮马长江垂头中原谓必无宋百僚窜身穀下汹汹举朝失色急诏起公遂自长沙拜命总戎胆落敌人不战而僨逆亮被戕一夕师遁额额淮城万井相望知几万家微公几亡嗣皇龙飞首请恢复都督诸军势如破竹符离之役暗鸣蟾戎遏溃争功师虽崩溃公独坚卧父子泣违观者泪堕敌不敢动复全淮南帝命公归正位具瞻再登鼎司才四穀朔百不一施谗口颌颌一跌不复羣飞刺天曷不慙遗一朝溘然上尝语铨朕忧魏公旦旦吁天期公壽隆一离谤铄卒以廢死谓上不懷言犹在耳民之无禄国丧元 为天下恸非哭其私公尝谓人平生相知邦衡子韶始末不移子韶已矣铨独在此懷禄不去其籛有泚敬遣家奴往致生刍矫首望云涕泗霑裾呜呼尚飨

祭吕尚书文

呜呼天乎何助桀为虐而不与尧为善乎奸鋏逆鼎逞桀之骍天胡不降之罰忠臣义士助尧为善天胡必殒其元是为善未必福为恶未必祸为造物之茫然嗟嗟我公亦可为大不幸此吾所以疾痛而呼天也天乎痛哉歲在豕韦有盗在夏脱周鼎之含牛盼长江而饮马繁冠养威而桀骍旄钺贪天而窃假额额淮城实襄据者公气沸膺谓大不可亟往莅师天子命我是何异以麟将狼而以一策之区区回狂澜于既涿机溃而发变生肘下气弗压于岱嵩身遂膏于原野虽引钩断舌莫伸桥柱之冤而嚼齿穿龈益厉睢阳之骂天乎痛哉仆在山林公独我知来赴阙下首加品题致康瓠防黄钟之赏而千金享补履之锥贤人君子方翕然恃以为司命而山崩海竭将鱼鸟之何依天乎痛哉公之幼孤堕地才腊呱呱弗子边事方割拂劒出门义不还顾防讐每至一旦千古谁不碌碌保妻子公独不暇字其孤谁不保宠死家簒公独不得全其軀何兰桂玉折而萧艾荣敷何奸回软熟富贵壽考而刚方正直反天厄以嶠岖信顏跖不相勘而苍苍者固不可以晓坎天乎痛哉嗟嗟我公复何为耶行耶止耶昧耶明耶岂形忘生死不忘君些将魂魄不死奄淮上以为家些岂块然冥漠郁千古之愤些将上诉天帝泄

不平之冤些岂烜赫威灵血食万世些将裒兵驱鬼以磔反寇些岂变为长虹以吞此鲸鲵些
将奋为烈缺霹雳以震荡敌人之窟穴些不然长雄八公山使草木皆神破苻坚百万之师些
幽冥茫然闻不闻些天乎痛哉哭声如疾雷破山泪如注海而倾河复何为耶复何为耶痛哉

祭萧清节先生文

汉罹莽祸鲍宣死忠蔡将君图先生道穷火不玉侵陰无日防元祐以还新学汶溺嬖花柳叶
圣道以熄天未丧文繄启先生如唐得韩正论以兴庄骚班马郊岛籍湜采掇无遗刍狗篇褒
百八十年剥华就实粤若崇观众恬以嬉觉微孤寡秦鉴宋 轩组纓来脱屣如遗城下之盟
中原蹀血彼婉变者腰颈决裂落落高标歲寒见节为彼不清廩作玉屑顾惟马走昔依洙墙
北面遗箴箴膏剥盲食实溉根报赐敢忘天不憖遗麟获鉏商有藁茂陵雷电取将其谁与归
屑涕黄壤呜呼哀哉尚享

祭顏知叙文

呜呼公乎实惟兗国公之苗裔渊也簞瓢公身三圭渊也短命公壽七十渊也无尺寸之地以
行其志公尝参大政事业暴天下较公所得亦已多矣复何所憾凡今为公戚戚者万里旅櫟
无家以归也将死之言无子以托也以是为可悲耳虽然是处青山可埋骨旅櫟非所悲有兄
弟有孙以承家无子非所悲则凡今为戚戚者皆非铨之所悲也铨同里闾尝同朝有一日之
雅膺命来莅兹土又获朝夕承顏接辞平生相知如公盖少一日不见而亡吁可悲也尚何言
哉尚何言哉百绕黄肠屑涕沾衣盖上以为天下恻而下以哭其私

传

罗孝逸先生传

罗无竞字谦中其先长沙人也遭马氏乱家庐陵曾祖晟祖亮父允以好善闻州里谦中皙頤
丰姿幼颖悟游学南昌且数歲有場屋声三舍法行歲时钩较行艺出诸生上疾士风日薄归
杜门防有熙河之役上书条利害特防褒美授迪功郎亲交强之行始为建宁主簿爱民如恐
伤御史束湿令鲁人黻货无艺谦中连注其过衙之思有所中伤无毛发衅罅令卒以贪败先
谦中尝摄尉乡民为鰥觥令意为盜檄尉缚既得移县以实则使喻以风指此可超某官笑曰
杀人以为梯忍耶遂白郡数十人得不死汀有剧贼众数千声誓建宁欲亡者与谋自全谦中
曰邑无小召吏民键以祸福为守备盜不入境去官百姓遮道归逾年丁外艰毁甚母不胜悲
不得已强食免丧不复仕号遯翁畜书万卷大搜其间故人清风觴咏终日家无他赢建炎间
金人渡江聚洛府谦中太息吾独如墨庄何寇过其庐曰儒先家也戒无犯自是避地以归咸
以方义成保一日忽得疾侍母不解忧棘泣数行下谓家人曰吾不得终养矣遂卒年五十三
门人私谥曰孝逸先生娶朱氏子良弼良佐谦中喜作诗高处切风雅平处往往鲍谢性天静
易未尝为汲引而荐者交章待人以和泛然应而终不易其介父事兄友其弟弟义死其孤方
襁褓养视数年而夭则以良佐为之后且嫁其女姑若妹窘而娶者给其膳终身死则具礼以

葬子姓皆兴于学绍兴初取士复诗赋良弼为乡举首无何上大享合宫恩耄期母年九十封太孺人人谓谦中仰亲俯子皆无可恨有集数卷经解数卷注青衿集三卷行于家先君宣教雅与公厚尝谓某兄弟谦中有佳儿予之师清节先生萧子荆谦中友也亦云故予兄弟乐与良弼游予登第后读书山中十年良弼未尝不来来未尝不论文终日后某被召大臣举予应直言极谏等科朋友有助焉良弼为多予其敢忘之顷得给事中李仲谦所为公墓志又以所闻补之为公传而窃评其大槩曰为亲而仕近毛义诙谐以诡时近东方朔遯以求志近渊明云

太史公曰在易之蛊曰干父之蛊意承考也又曰不事王侯高尚其事一卦而二戒具圣人之意深矣崇观以来迄于政宣之间童蔡方君图门如沸羹人争趋之朝舆台而暮门两柱者肩摩于朝而不知其害及靖康之变凡其党与耄婴颈血不死刀锯则死以兵骨相枕于道头颅有行万里者谦中是时方白水卷帘而青山隠几也夫然后知公之为高然犹绊名县掾者天命不可违也进不违义命则合乎承考之义知时不可为而止则合乎高尚之戒谓之孝逸不予欺云

澹庵文集卷五

澹庵文集卷六

宋 胡铨 撰

书

答谭思顺书

向者辱賤教扳援河伯海若问答及引孟子观海难为水游圣人难为言之论以至正人心之說反覆数百言三复感叹知足下之望于仆也至矣乡以方有私家戚不即裁答因循至今夫言辞之不酬虽孔子不得行于互乡况如足下之学识非互乡之比而又于仆恳恳耶又安得默默而但已哉夫自古论圣人之道以江海为喻者多矣而皆未能尽江海之极致何者以其未尝识海也铨尝浮于海矣初自谓世之知海之极致者宜莫如铨今夫海之为器也南灔炎荒北洒璇极东演蒙汜西薄月 渺沧溟与渤澥波黏天以潏沔洑渚防灔浮空迷岸襄陵广漠写胶漫汗影沙礧石荡穹沃日颓云屑雨崩涛卷雪状如天穀胶戾而激转倏若坤舆挺定而辐裂飞流溅沫决背股栗其虫千怪万状而不可悉数其鸟兽诡态殊形而不可致诘其舟如凌空之山其帆如垂天之云千寻之艫万斛之 巨舰广 若般若防若吴之舳舻舳舻若楚之艨艟飞鹖千艘万舵舳舻相衔翻若鸿惊瞥若鸥没飘风一日踔数千里涌不见畔岸决檣摧撞罔然鸟逝吁可畏哉水怪则有海童邀路马衔当蹊河伯罔象出没隱见蜃楼忽起突兀万仞摩云排空天地黯黯斗变异色则有吞舟之鰐嵨 孤游长髻梢云巨鬣刺天哆口脩牙剑防嵯嵯崇岛巨鳌延袤千里擎洪涛樯北斗五岳鼓舞穷世间万彙举不足以尽其变态虽极班彪之览木华之赋酈元之经卢肇之說韩愈之碑雄辞杰识曾莫能诘其髣髴信乎观于海者难为水乎知海之难为水则知圣门之难为言亦犹是矣今夫源深者流必洪必至之理也有德者必有言必至之理也难为水者非水之难也其渊源之大为难难为言者非言之难也其德之盛为难德水也言浮物也水之大而物之浮者大小必浮德盛则其言也防必遠亦其理也昔者孔子道大而德博其垂世立教非有心于言也而能言之类莫能加焉门弟子能得其微辞奥防者寡矣惟许顔回于吾言无所不說至于商也赐也可与言诗雍也然偃也是于漆雕开则說之曾皙则与之亦庶几矣然子夏之学流而为田子方田子方流而为庄周庄周之书喜称子方之为人则商虽可与言诗其失也诞子贡之辯多为圣人之所诎至答原宪之问终身耻之则赐虽可与言诗而其失也躁子游习于礼至论本末而子夏以为过则偃虽言是而其失也诬若夫宰予善为說辞而圣人且有失之子我之讥顓孙师论至恩义善矣而偃也参也皆诋其不仁圣人亦疑其忠信不足有若强识好古能明孝弟善也而于羣弟子之问懵不能对夫数子者皆号升堂入室而不及回也得圣人之所以言其不谓之难乎哉善哉齐太史子与之言曰乃今而后知太山之高沧海之为大惜乎夫子之道德不加于民也信乎其知圣人之道也铨也学苦而身益穷何足与论圣人之道而足下不以为可鄙乃至扳援古者以发固陋辞义高遠殆非区区者所宜得此也然仆窃有疑焉惜足下不期至于海而自比于河伯而止也夫沿河而下苟不止虽有疾迟必至于海故学者必慎其所道道于曲学异端而欲究圣人之言诚韩愈所谓航断港絕潢以望至于海也故欲究圣人之言必自韩子始士固伸于知己足下其母谓晓晓不一

答陈汉臣书

铨白解元陈君昨日防惠长书斋戒伏诵觉气格不类海外人文章因请问师友渊源所自而吾子答以常从张庆符学于是知吾子盖有师承而非若庸庸无模范者仆前在吉阳与伯麟庆符交得庆符诗若文凡百许篇庆符辛未之春自吉阳脱罪罢北归滞留于琼者累岁甲戌春正月忽沿赣复至吉阳相从累月欢甚既别三年而仆防恩徙衡意谓到琼当握手道旧写三年之悲才弛担即访问庆符安否闻寓村落距城三四十里病不能出为之怅然者久之两日前偶于直殿李侯处得书启两纸而继得吾子之书重思庆符而不得见见庆符之所往来者则如庆符焉况吾子亲炙其人而其文又有似吾庆符者乎退之见李师锡如见李元宾殆此比也观吾子之姓名庆符之声誉恍若梦寐诵吾子之书见庆符之范知师友之不苟也子之言以铨为知命守道不违孔孟者铨岂敢当此盖庶几焉而未云有得万分之一徒喜吾子之学庆符而其文有似于吾庆符也故言之吾子其勉焉将复有深于是者欤铨将南乡酌酒以贺庆符之席得人也吾子其勉之

遗从子维宁书

古之君子学欲其日益善欲其日加德欲其日起体欲其日强行欲其日勉心欲其日休道欲其日章以为未也又日知其所亡见其所不见一日不使其躬怠焉其爱日如是足矣犹以为未也必时习焉无一时不习也必时敏焉无一时不敏也必时中焉无一时不中也其竞时如是而已矣犹以为未也则日夜者日之余也吾必继晷焉灯必亲薪必燃膏必焚烛必秉蜡必濡萤必照月必带雪必映光必隙明必借暗则记呜呼如此极矣然而君子又曰终夜不寝必如孔子鸡鸣而起必如大舜坐以待旦必如周公然则何时而已耶范甯曰君子之为学也没身而已矣

答温彦侄书

叔铨告秋爽想与诸幼康健领字甚慰老抱昨辱赠别佳句如南朝欲相身方上北国闻风骨已寒不敢当谨藏十萃以无忘蓼萧数日前传侄妇违和未的殊在虑叔此粗常唯侍立脩史无暇奉讯脱然驰想不若是想未间力职爱厚

叔铨告宠寄佳篇如已听恩波生茗椀更看皇泽下鸡竿意味皆妙难甘不是唐工部窃效犹堪艳绣鞍似觉慊然何也近上庠诸俊有见访者谈吾侄不容口董子羽参入亦称道不置一第直溷子耳何慊乎哉着鞍一来是望是望

颂

后芎山颂

猗欤芎城层霄可摩视彼乔岳亦云峨峨德则降神不知其他刻此颂焉与山不磨

月中桂颂

月中桂美曾君将折桂也桂枝高高晔晔其华红蕊披离少陵诗葩桂枝高高有蕢其实鹫峰子落秋半之夕桂枝高高其影亭亭仰天而攀我思少陵

疏

莲花寺脩造疏

如来烧亦尽只有一羣僧尝闻其言今覩斯事谁划堂前一丈草动是荆榛风卷屋上三重茅难安燕雀要见烟生碧瓦除非血染青蚨且莫笑火里莲花也须念雨中泥佛

莲花寺重修造疏

清凉宝山眷属万人之常在金色世界龙天八部之同居正如月住虚空谩道佛须塔庙然而真智无方则一尘灭幻縁有在则三界瞻况如来适当尽焚在众僧故应作礼我是以收之煨烬加以庄严焚其庐而火其书已是遭他毒手归依佛而归依法更愿拯我颓风一切见闻大家回向

修值夏街疏

修心莫如修路路若平即是心平安居须念安行行者穩自然居穩愿资众力共辟坦途

泰霄观修殿疏

父析薪其子弗克负荷鲁史所诛考坐室厥子乃不肯堂周书攸戒每恻卑室从读高真况前代之规模其来甚逺宜后昆之率履可不钦承要识个木作天何必玉真公主如欲见钱流地岂假银衣道人自有当仁能办兹事

青原山抄题买田疏

防乏芳飧多误食时持鉢生有菜色率当斋后闻钟何曾螺化为炊动辄鱼生于釜敢垂涎于白粲徒梦寐于黄粱念一饱之无时遍十方而请命要托心地广开福田倘种德之弗深则为仁而不熟惟诸檀越发大慈悲少不嫌贫女一钱多勿吝给孤广布我欲深耕易耨令居者有积仓剝莽披蓁使世间无寸草一视青原界尽为白望庄稻有鬻牙黍多燕颌饱少陵翻匙之雪飧涪翁乱眼之云必有当仁能办兹事一犁春雨且剩买垆里黑牡丹万顷良田不易吃饭中铁菱角

附长短句

浣溪纱

忽忽春归没计遮百年都似散余霞持杯聊听浣溪沙但觉暗添双鬓雪不知落尽一番花东风寒似夜来

些

转调定风波【和荅海南统领陈康时】

从古将军自有真引杯看剑坐生春扰扰介鳞何足扫谈笑纶巾羽扇典型新试问天山何日定伫听雅歌长啸静胡尘解道汾阳是人杰见説如今也有谪仙人

菩萨蛮【辛未七夕戲荅张庆符】

银河牛女年年渡相逢未款还忧去珠斗欲防干盈盈一水间玉人偷拜月苦恨匆匆别此意愿天怜今宵长似年

减字木兰花【庆符引赦自便已脱去至东界又遭郡中勾回遂有弄璋之喜庆符云尝梦舅氏知梦吉也予尝占庆符当弄瓦赌主人庆符来督故词中具之】

渭阳佳梦瓦变成璋真妙弄不是勾回汤饼冤家唤得来不分利市要我开尊真倒置试问坡翁此事如何着得依

醉落魄【辛未九月望和荅庆符】

百年强半高秋犹在天南畔幽懷已被黄花乱更恨银蟾故向愁人满招呼诗酒颠狂伴羽觞到手判无算浩歌箕踞巾聊岸酒欲醒时兴在卢仝盃

醉落魄【和荅陈景卫望湖楼见忆】

千岩竞秀西湖好是春时 谁知梅雪飘零从藏白收香空防和 手天涯万里情难逗眉峰岂为伤春皱片愁未信花能绣若説相思只恐天应瘦

鹧鸪天【癸酉吉阳用山谷韵】

梦绕松江属玉飞秋风莼美更鲈肥不因入海求诗句万里投荒亦岂宜青箬笠緑荷衣斜风细雨也须归崖州险似风波海海里风波有定时

鹧鸪天【和陈景卫忆西湖】

一忆西湖太瘦生十年不到梦曾行空蒙山色烟霏晚淡淹湖光雾濛防
芳草遶暮云平雨余空翠入帘明梦回一饷难存济这错都因自打成

朝中措【黄守座上用六一先生韵】

崖州何有水连空人在浪花中月屿一声横竹云帆万里雄风
多情太守三千珠履二肆歌钟日下即归黄霸海南长想文翁

采桑子【甲戌和陈景卫韵】

山浮海上青螺遶决眦归鸿间倚东风叠叠层云欲荡胸
弄琴细寫清江引一洗愁容木杪黄封贤圣都堪日日中

临江僊【和陈景卫忆梅】

我与梅花真莫逆别来长恐因循几年不见岭头青栩栩然蝴蝶梦魂梦竟非真
浪蘂浮花空满眼愁眉不展长颦此君还似不羈人月邊风伴千里淡相亲

如梦令

谁念新州人老几度斜阳芳草伏雨欲晴时梅雨故来相恼休恼体恼几个荔支能好

玉楼青【赠李都监侍兒是夕歌六么】

十年目断鲸波濶万里相逢歌怨咽髻鬟春雾翠微重眉黛秋山烟雨抹
小槽旋滴真珠滑断送一生花十八醉中扶上木牀儿酒醒梦回空对月

清平乐【和曾检法海棠】

深深花院雨虐风饕遍只欠画洞箫羽扇谁领畧春风面愁须诗酒相禁少陵底事慵吟不是
为梅牵兴怕渠恼

乱春心【王介甫梅诗云少陵为尔牵诗兴可是无心赋海棠故云】

青玉案【乙酉重九日葛守座上作】

宜霜开尽秋光老感節物愁多少尘世难逢开口笑满林风雨一江烟水飒爽惊吹防
玉堂金马何须道且鬪取尊前玉山倒燕寝香清官事了紫萸黄菊皂罗红袖花与人俱好

澹庵文集卷六

澹庵文集附錄

本传

胡忠简公铨字邦衡庐陵值夏人自幼以通特知名尝从乡先生萧楚学春秋尽得其指宋建炎二年高宗防土维扬问治道本天天道本民公对万言汤武以民而兴桀纣以天而亡今陛下起干戈锋镝间外乱内讧而防臣数十条皆质之天不聼于民词多切直高宗异之将冠多士忌者移寘第五授抚州军事判官未上防隆祐太后避兵赣州金人蹶之公哀眈为兵按其衡转承直郎擢吉州军事判官以父丧归绍兴五年督府张浚辟之不赴兵部尚书吕祉以贤良方正荐赐对除编修官八年宰臣秦桧主和金使以诏谕江南为名中外汹汹公抗疏言曰臣谨按王伦本一狎邪小人市井无赖顷緣宰相无识遂举以使敌专务诈诞欺罔天聽驟得美官天下之人切齿唾骂今者无故诱致敌使以诏谕江南为名是欲臣妾我也欲刘豫我也刘豫臣事北国南面称王自以为子孙帝王万世不拔之业一旦敌人改虑猝而缚之父子为囚殷鉴不遠而伦又欲陛下效之夫天下者祖宗之天下也陛下所居之位祖宗之位也奈何以祖宗之天下为强敌之天下以祖宗之位为强敌藩臣之位陛下一屈膝则祖宗庙社之灵尽污草莽祖宗数百年之赤子尽为左衽朝廷宰执尽为陪臣天下士大夫皆当裂冠毁冕变为异服异时敌人无厌之求安知不加以无礼如刘豫也哉夫三尺童子至无识也指所仇而使之拜则佛然怒今北敌则仇讐也堂堂大国相率而拜仇讐曾童孺之所羞而陛下忍为之耶伦之议乃曰我若屈膝则梓宫可还太后可复渊圣可归中原可得呜呼自变故以来主和议者谁不以此說啗陛下哉然而卒无一验则敌之情伪已可知矣陛下尚不觉悟竭民膏血而不恤忘国大讎而不报含垢忍耻举天下而臣之甘心焉就令彼决可和尽如伦议天下后世谓陛下何如主况北人变诈百出而伦又以奸邪济之梓宫决不可还太后决不可复渊圣决不可归中原决不可得而此膝一屈不可复伸国势凌夷不可复振可为痛哭流涕长太息矣向者陛下间关海道危如累卵当时尚不忍北面臣敌况今国势稍张诸将尽銳士卒思奋如顷者北敌陆梁伪豫入寇固尝败之于襄阳败之于淮上败之于涡口败之于淮陰较之往时蹈海之危固已万万傥不得已而用兵则我岂遽出敌人下哉今无故而反臣之欲屈万乘之尊下穹庐之拜三军之士不战而气已索此鲁仲连所以义不帝秦非惜夫帝秦之虚名惜天下大势有所不可也今内而百官外而军民万口一谈皆欲食伦之肉谤议汹汹陛下不闻正恐一旦变作祸且不测臣窃谓不斩王伦国之存亡未可知也虽然伦不足道也秦桧以腹心大臣而亦为之陛下有尧舜之资桧不能致君如唐虞而欲导陛下为石晋近者礼部侍郎曾开引古谊以折之桧乃厉声责曰侍郎知故事我独不知则桧之遂非愎谏已自可见而乃建白令台谏侍臣劾议可否是盖畏天下议已而令台谏侍臣共分谤耳有识之士皆以为朝廷无人吁可惜哉孔子曰微管仲吾其披发左衽矣夫管仲霸者之佐耳尚能变左衽之区而为衣裳之防秦桧大国之相也反驱衣冠之俗而为左衽之乡则桧也不唯陛下之罪人实管仲之罪人矣孙近傅防桧议遂得参知政事天下望治有如饥渴而近伴食中书漫不敢可否事桧曰敌可和近亦曰可和桧曰天子当拜近亦曰当拜臣尝至政事堂三发问而近不答但曰已令台谏侍从议矣呜呼参贊大政徒取充位如此有如敌骑长驱尚能折冲御侮耶臣窃谓秦桧孙近亦可斩也臣备员枢属义不与桧等共戴天区区之心愿斩三人头竿之藁街然后羈留敌使责以无礼徐兴问罪之师则三军之士不战而气自倍不然臣有赴东海而

死尔宁能处小朝廷求活耶书上桧以公狂悖鼓众除名编管昭州台谏多救之者桧迫于公论乃以公监广州盐仓明年改签书威武军判官十二年谏官罗汝楫劾公饰非横议诏除名编管新州十八年新州守张棣讦公谤讪怨望移谪吉阳军二十六年桧死移衡州初吴师古侵公疏金人募之千金陈刚中以启送之甚为称誉王珪亦以诗赠或告桧师古流袁州珪流辰州刚中谪安远县死焉孝宗即位复奉议郎知饶州召对言修德结民练兵观衅帝曰从闻卿直谅除吏部郎官迁秘书少监擢起居郎公奏曰臣承乏左右史窃见史失职者非一尤甚者有四昔唐太宗欲观史褚遂良以为不可恐史臣讳避不敢直书耳则记注不必呈也唐制皇帝御殿左右史夹列善恶必书许敬忠李义府用事改立于殿东南隅于是人主言动不得闻则旧制宜复也夫左右史侍天子之侧非有前后殿之分也今独侍后殿而前殿不与义果安在则前殿宜立也昔文宗谓魏謩曰事有不当毋嫌论奏故国朝左右史皆许前奏事皇祐中唐介论文彦博帝怒时蔡襄修起居注直前论救又曷尝预牒阁门与必俟班次耶则奏宜直前也诏从之兼侍讲国史院编修官公请都建康其畧言汉高入關中光武守信都夫与人鬪不搯其吭拊其背不能全胜今日大势自淮以北天下之吭与背也建康则搯之拊之之地也若进据建康下临中原此高光兴王之计也张浚王十朋克复宿州将李显忠与邵宏渊忿争军大溃十朋自劾帝怒甚公疏愿毋以小衅自沮寻因灾异求言公应诏上书大畧举春秋灾异以明政令之阙及上下之情不合各有十且言尧舜明四目达四聪虽有共鯀不能塞也秦二世以赵高为腹心刘项横行而不得闻汉成帝杀王章王氏移鼎而不得闻灵帝杀何武陈蕃天下横溃而不得闻梁武信朱异侯景斩关而不得闻隋炀帝信虞世基李密称帝而不得闻唐明皇逐张九龄安史胎祸而不得闻陛下昔召臣及张焘辛次膺王大宝王十朋并入今焘与次膺十朋相继去大宝亦且行矣独臣在尔以言为讳而欲塞灾异之源臣知其必不得也公又言昔周世宗为刘晏所败斩失律将何徽等七十人军威大震卒败晏取淮南定三关夫一日戮七十将岂复有将可用而世宗终能恢复岂非庸懦者去则勇敢者出耶近宿州之败士死敌者满野而诸将以金赂权贵自解天变昭然惟陛下信赏必罚以应天变今廷臣以箝默为贤容悦为忠驯至兴元之幸所谓一言丧邦帝曰非卿不闻此金人求成公曰金人知陛下銳意恢复故以甘言欺我愿絶口勿言和帝以边事倚张浚而王之望尹穡专主和排浚铨廷责之寻兼权中书舍人同修国史诏问廷臣和戎可否时主和者半两持者半言和不可者公一人而已乃上疏陈其状言京师失守自耿南仲主和二圣播迁自何 主和维扬失守自汪伯彦黄潜善主和完顏亮之变自秦桧主和议者乃曰外虽和而内不忘战此权臣误国之言一溺于和不能自振尚能战乎除宗正少卿乞补外不许先是金将以泗州及军百人降诏并为节度使公言受降古所难六朝七得河南之地不旋踵而皆失梁武时候景以河南来奔未几而陷台城宣政间郭药师自燕云来降未几为中国患今金三将内附第高其爵禄优其部曲以系中原之心则可若处之近地万一包藏祸心潜为内应后将噬脐愿勿任以兵柄迁其众于湖广以絶后患二年兼国子祭酒寻降权兵部侍郎帝以灾异诏廷臣言阙政急务公以赈灾为急务议和为阙政其书曰自靖康迄今凡四十年三遭大变皆在和议则敌人之不可与和明矣肉食鄙夫万口一谈牢不可破非不知和之害而争言为和者有三說焉曰偷懦曰苟安曰附防偷懦则不知立国苟安则不戒酖毒附防则觊得美官小人之情状具于此矣今日之议若成则有可吊者十若不成则有可贺者亦十请为陛下极言之何谓可吊者十真宗时宰相李沆谓王旦曰我死公必为相切勿与敌和吾闻出则无敌国外患如是者国恒亡若与敌和自此中国必多事矣旦殊不以为善既而遂和海内虚耗旦始悔不用文

靖之言此可吊者一也中原讴吟思归之人日夜引领望陛下拯溺救焚不啻赤子之望慈父母一与敌和则中原绝望后悔何及此可吊者二也海泗今日之藩篱咽喉也彼得海泗且决吾藩篱以瞰吾室扼吾咽喉以制吾命则两淮决不可保两淮不保则大江决不可守大江不守则江浙决不可安此可吊者三也绍兴戊午和议既成桧建议遣二三大臣如路允迪等分往南京等州交割归地一旦叛盟劫执允迪等遂下亲征之诏彼复请和其反覆变诈如此桧犹不悟奉之如初事之愈谨赂之愈厚卒有金亮之变惊动輶轳太上谋欲入海行朝居民一空覆辙不遽忽而不戒臣恐后车又将覆也此可吊者四也绍兴之和首议决不与归正人口血未干尽变前议凡归正之人一切遣还如程师回赵良嗣等聚族数百几为萧墙忧今必尽索归正之人与之则反侧生变不与则敌决不肯但已夫反侧则肘腋之变深敌决不肯但已则必别起衅端猝有金亮之谋不知何以待之此可吊者五也自桧当国二十年间竭民膏血以饵仇讐迄今府库无旬日之储千村万落生理萧然重以蝗虫水潦自此复和则蠹国害民殆有甚焉者矣此可吊者六也今日之患兵费已广养兵之外又增岁币且少以十年计之其费无虑数千万而岁币之外又有私觐之费私觐之外又有贺正生辰之使贺正生辰之外又有泛使一使未去一使复来生民疲于奔命帑廩涸于将迎瘠中国以肥敌陛下何惮而为之此其可吊者七也侧闻敌人过望欲书御名欲去国号大字欲用再拜议者以为繁文小节不必计较臣窃以为议者可斩也夫四郊多垒卿大夫之辱楚子问鼎义士之所深耻献纳二字富弼以死争之今敌人横行与多垒孰辱国号大小与鼎轻重孰多献纳二字与再拜孰重臣子欲君父屈己以从之则是多垒不足辱问鼎不必耻献纳不必争此其可吊者八也臣恐再拜不已必至称臣称臣不已必至请降请降不已必至纳土纳土不已必至衔璧衔璧不已必至舆榘舆榘不已必至如晋帝青衣行酒然后为快此其可吊者九也事至于此求为匹夫尚可乎此其可吊者十也窃观今日之势和决不成傥干刚独断追回使者魏杞康渚等绝请和之议以鼓战士下哀痛之诏以收民心天下庶乎其可为矣如此则有可贺者亦十省数千万之岁币一也专意武备足食足兵二也无书名之耻三也无去大之辱四也无再拜之屈五也无称臣之忿六也无请降之祸七也无纳土之悲八也无衔璧舆榘之酷九也无青衣行酒之冤十也去十吊而就十贺利害较然虽三尺童穉亦知之而陛下不悟春秋左氏谓无勇者为妇人今日举朝之士皆妇人也如以臣言为不然乞赐流放窜殛以为臣子出位犯分之戒自符离之败以弃唐邓海泗四州与金金又欲得商秦地邀岁币留使者魏杞分兵攻淮于是命公措置浙西淮东海道时金兵号八十万刘宝弃楚州王彦弃昭关濠滁皆陷惟高邮守臣陈敏拒敌射阳湖而大将李宝预求密诏为自安计拥兵不救公劾奏之曰臣受诏令范荣备淮李宝备江缓急相援今宝视敏弗救若射阳失守大事去矣宝惧始出师犄角时大雪河冰皆合公先持铁锤锤冰士皆用命金人遂退乾道初以集英殿修撰知漳州改全州入奏事留为工部侍郎公曰陛下尝许臣誓不与金和何为中变又谓臣决移蹕建康何为中辍上曰以民之不易少须公曰少康以一旅复禹迹陛下富有四海即位九年耻尚未复且四方水旱请令有司速为备歷敷文阁直学士尝宴见言初经筵之臣七人惟臣独在臣老矣愿乞身归田里上问今安归对曰臣庐陵人向在岭海训传诸经欲成此书特赐犀带宠之归上所着易春秋周礼礼记解诏藏秘书省累转朝奉郎进封开国伯又进封郡侯淳熙六年召赴行在所辞不许遂力疾转朝议大夫从之以资政殿学士致仕明年卒口授遗表有死为厉鬼杀贼之语表闻特赠通议大夫尝名其庵曰澹取贾生澹若深渊意有澹庵集一百卷孙槃槃皆官至尚书

宋史本传

胡铨字邦衡庐陵人建炎二年高宗防土淮海铨因御题问治道本天天道本民答云汤武聽民而兴桀纣聽天而亡今陛下起干戈鋒鏑間外亂內訌而防臣數十條皆質之天不聽于民又謂今宰相非晏殊樞密參政非韓琦杜衍范仲淹防万余言高宗見而異之將冠之多士有忌其直者移寘第五授抚州军事判官未上防隆祐太后避兵贛州金人蹶之铨以漕檄掇本州幕募乡丁助官军捍御第赏转承直郎丁父忧从乡先生萧楚学春秋绍兴五年张浚开督府辟湖北仓属不赴有诏赴都堂审察兵部尚书吕祉以贤良方正荐赐对除枢密院编修官八年宰臣秦桧决防主和金使以诏谕江南为名中外汹汹铨抗疏言曰臣谨案王伦本一狎邪小人市井无赖顷緣宰相无识遂举以使敌专务诈诞欺罔天聽驟得美官天下之人切齿唾骂今者无故诱致敌使以诏谕江南为名是欲臣妾我也欲刘豫我也刘豫臣事北狄南面称王自以为子孙帝王万世不拔之业一旦敌人改虑猝而缚之父子为囚商鉴不遠而伦又欲陛下效之夫天下者祖宗之天下也陛下所居之位祖宗之位也奈何以祖宗之天下为仇敌之天下以祖宗之位为仇敌藩臣之位陛下一屈膝则祖宗庙社之灵尽污草莽祖宗数百年之赤子尽为左衽朝廷宰执尽为陪臣天下士大夫皆当裂冠毀冕变为异服异时敌人无厌之求安知不加以无礼如刘豫也哉夫三尺童子至无识也指所仇而使之拜则佛然怒今北敌则仇讐也堂堂大国相率而拜仇讐曾童孺之所羞而陛下忍为之耶伦之议乃曰我一屈膝则梓宫可还太后可复渊圣可归中原可得呜呼自变故以来主和议者谁不以此說陷陛下哉然而卒无一验则敌之情伪已可知矣而陛下尚不觉悟竭民膏血而不恤忘国大讎而不报含垢忍耻举天下而臣之甘心焉就令彼决可和尽如伦议天下后世谓陛下何如主况北人变诈百出而伦又以奸邪济之梓宫决不可还太后决不可复渊圣决不可归中原决不可得而此膝一屈不可复伸国势陵夷不可复振可为痛哭流涕长太息矣向者陛下间关海道危如累卵当时尚不忍北面臣敌况今国势稍张诸将尽銳士卒思奋只如顷者北敌陆梁伪豫入寇固尝败之于襄阳败之于淮上败之于涡口败之于淮陰校之往时蹈海之危固已万万憊不得已而至于用兵则我岂遽出敌人下哉今无故而反臣之欲屈万乘之尊下穹庐之拜三军之士不战而气已索此鲁仲连所以义不帝秦非惜夫帝秦之虚名惜天下大势有所不可也今内而百官外而军民万口一谈皆欲食伦之肉谤议汹汹陛下不闻正恐一旦变作祸且不测臣窃谓不斩王伦国之存亡未可知也虽然伦不足道也秦桧以腹心大臣而亦为之陛下有尧舜之资桧不能致君唐虞而欲导陛下为石晋近者礼部侍郎曾开等引古谊以折之桧乃厉声责曰侍郎知故事我独不知则桧之遂非愎谏已自可见而乃建白令台谏侍臣劾议可否是盖畏天下议已而令台谏侍臣共分谤耳有识之士皆以为朝廷无人吁可惜哉孔子曰微管仲吾其被发左衽矣夫管仲霸者之佐耳尚能变左衽之区而为衣裳之防秦桧大国之相也反驱衣冠之俗而为左衽之乡则桧也不惟陛下之罪人实管仲之罪人矣孙近传防桧议遂得参知政事天下望治有如饥渴而近伴食中书漫不敢可否事桧曰敌可和近亦曰可和桧曰天子当拜近亦曰当拜臣尝至政事堂三发问而近不答但曰已令台谏侍从议矣呜呼参贊大政徒取充位如此有如敌骑长驱尚能折冲御侮耶臣窃谓秦桧孙近亦可斩也臣备员枢属义不与桧等共戴天区区之心愿断三人头竿之藁街然后羈留敌使责以无礼徐兴问罪之师则三军之士不战而气自倍不然臣有赴东海而死尔宁能处小朝廷求活耶书既上桧以铨狂妄凶悖鼓众劫持诏除名编管昭州仍降诏播告中外给

舍台諫及朝臣多救之者桧迫于公论乃以铨监广州盐仓明年改签书威武军判官十二年諫官罗汝楫劾铨饰非横议诏除名编管新州十八年新州守臣张棣讦铨与客唱酬谤讟怨望移谪吉阳军二十六年桧死铨量移衡州铨之初上书也宜兴进士吴师古劄木传之金人募其书千金其谪广州也朝士陈刚中以启事为贺其谪新州也同郡王廷珪以诗赠行皆为人所讦师古流袁州廷珪流辰州刚中谪知防州安远县遂死焉三十一年铨得自便孝宗即位复奉议郎知饶州召对言修德结民练兵观衅上曰从闻卿直谅除吏部郎官隆兴元年迁秘书少监擢起居郎论史官失职者四一谓记注不必进呈庶人主有不观史之美二谓唐制二史立螭头之下今在殿东南隅言动未尝得闻三谓二史立后殿而前殿不立乞于前后殿皆分日侍立四谓史官欲其直前而阁门以未尝预牒以今日无班次为辞乞自今直前言事不必预牒阁门及以有无班次为拘诏从之兼侍讲国史院编修官因讲礼记曰君以礼为重礼以分为重分以名为重愿陛下无以名器轻假人又进言乞都建康谓汉高入关中光武守信都大抵与人鬪不搯其吭拊其背不能全胜今日大势自淮以北天下之吭与背也建康则搯之拊之之地也若进据建康下临中原此高光兴王之计也诏议行幸言者请纾其期遂以张浚视师图恢复侍御史王十朋贊之克复宿州大将李显忠私其金帛且与邵宏渊忿争军大溃十朋自劾上怒甚铨上疏愿毋以小衅自沮时旱蝗星变诏问政事阙失铨应诏上书数千言始终以春秋书灾异之法言政令之阙有十而上下之情不合亦有十且言尧舜明四目达四聪虽有共鯀不能塞也秦二世以赵高为腹心刘项横行而不得闻汉成帝杀王章王氏移鼎而不得闻灵帝杀何武陈蕃天下横溃而不得闻梁武信朱异侯景斩关而不得闻隋炀帝信虞世基李密称帝而不得闻唐明皇逐张九龄安史胎祸而不得闻陛下自即位以来号召逐客与臣同召者张焘辛次膺王大宝王十朋今焘去矣次膺去矣大宝又将去惟臣在尔以言为讳而欲塞灾异之源臣知其必不能也铨又言昔周世宗为刘旻所败斩败将何徽等七十人军威大震果败旻取淮南定三关夫一日戮七十将岂复有将可用而世宗终能恢复非庸懦者去则勇敢者出耶近宿州之败士死于敌者满野而败军之将以所得之金赂权贵以自解上天见变昭然陛下非信赏必罚以应天不可其论纳諫曰今廷臣以箝默为贤容悦为忠驯至兴元之幸所谓一言丧邦上曰非卿不闻此金人求成铨曰金人知陛下銳意恢复故以甘言欺我愿絶口勿言和字上以边事全倚张浚而王之望尹穡专主和排浚铨廷责之兼权中书舍人同修国史张浚之子栻赐金紫铨缴奏之谓不当如此待勲臣子浚雅与铨厚不顾也十一月诏以和戎遣使大询于庭侍从台諫预议者凡十有四人主和者半可否者半言不可和者铨一人而已乃独上一议曰京师失守自耿南仲主和二圣播迁自何主和维扬失守自汪伯彦黄潜善主和完顏亮之变自秦桧主和议者乃曰外虽和而内不忘战此向来权臣误国之言也一溺于和不能自振尚能战乎除宗正少卿乞补外不许先是金将蒲察徒穆大周仁以泗州降萧琦以军百人降诏并为节度使铨言受降古所难六朝七得河南之地不旋踵而皆失梁武时候景以河南来奔未几而陷台城宣政间郭药师自燕云来降未几为中国患今金之三大将内附高其爵禄优其部曲以系中原之心善矣然处之近地万一包藏祸心或为内应后将噬脐愿勿任以兵柄迁其众于湖广以絶后患二年兼国子祭酒寻除权兵部侍郎八月上以灾异避殿减膳诏廷臣言阙政急务铨以振灾为急务议和为阙政其议和之书曰自靖康迄今凡四十年三遭大变皆在和议则金人之不可与和彰彰明矣肉食鄙夫万口一谈牢不可破非不知和议之害而争言为和者是有三說焉曰偷懦曰苟安曰附防偷懦则不知立国苟安则不戒酖毒附防则觊得美官小人之情状具于此矣今日之议若

成则有可吊者十若不成则有可贺者亦十请为陛下极言之何谓可吊者十真宗皇帝时宰相李沆谓王旦曰我死公必为相切勿与敌讲和吾闻出则无敌国外患如是者国常亡若与敌和自此中国必多事矣旦殊不以为然既而遂和海内干耗旦始悔不用文靖之言此可吊者一也中原讴吟思归之人日夜引领望陛下拯溺救焚不啻赤子之望慈父母一与敌和则中原绝望后悔何及此可吊者二也海泗今日之藩篱咽喉也彼得海泗且决吾藩篱以瞰吾室扼吾咽喉以制吾命则两淮决不可保两淮不保则大江决不可守大江不守则江浙决不可安此可吊者三也绍兴戊午和议既成桧建议遣二三大臣如路允迪等分往南京等州交割归地一旦叛盟劫执允迪等遂下亲征之诏彼复请和其反覆变诈如此桧犹不悟奉之如初事之愈谨赂之愈厚卒有金亮之变惊动輶轂太上谋欲入海行朝居民一空覆辙不遑忽而不戒臣恐后车又将覆也此可吊者四也绍兴之和首议决不与归正人口血未干尽变前议凡归正之人一切遣还如程师回赵良嗣等聚族数百几为萧墙忧今必尽索归正之人与之则反侧生变不与则敌决不肯但已夫反侧则肘腋之变深敌决不肯但已则必别起衅端猝有金亮之谋不知何以待之此可吊者五也自桧当国二十年间竭民膏血以饵仇讎迄今府库无旬月之储千村万落生理萧然重以蝗虫水潦自此复和则蠹国害民殆有甚焉者矣此可吊者六也今日之患兵费已广养兵之外又增岁币且少以十年计之其费无虑数千万而岁币之外又有私觐之费私觐之外又有贺正生辰之使贺正生辰之外又有泛使一使未去一使复来生民疲于奔命帑廩涸于将迎瘠中国以肥敌陛下何惮而为之此其可吊者七也侧闻敌人嫚书欲书御名欲去国号大字欲用再拜议者以为繁文小节不必计较臣窃以为议者可斩也夫四郊多垒卿大夫之辱楚子问鼎义士之所深耻献纳二字富弼以死争之今强敌横行与多垒孰辱国号大小与鼎轻重孰多献纳二字与再拜孰重臣子欲君父屈己以从之则是多垒不足辱问鼎不必耻献纳不必争此其可吊者八也臣恐再拜不已必至称臣称臣不已必至请降请降不已必至纳土纳土不已必至衔璧衔璧不已必至舆榘舆榘不已必至如晋帝青衣行酒然后为快此其可吊者九也事至于此求为匹夫尚可得乎此其可吊者十也窃观今日之势和决不成傥乾纲独断追回使者魏杞康渚等绝请和之议以鼓战士下哀痛之诏以收民心天下庶乎其可为矣如此则有可贺者亦十省数千万之岁币一也专意武备足食足兵二也无书名之耻三也无去大之辱四也无再拜之屈五也无称臣之忿六也无请降之祸七也无纳土之悲八也无衔璧舆榘之酷九也无青衣行酒之冤十也去十吊而就十贺利害较然虽三尺童穉亦知之而陛下不悟春秋左氏谓无勇者为妇人今日举朝之士皆妇人也如以臣言为不然乞赐流放窜殛以为臣子出位犯分之戒自符离之败朝论急于和戎弃唐邓海泗四州于金矣金又欲得商秦地邀岁币留使者魏杞分兵攻淮以本职措置浙西淮东海道时金使仆散忠义纻石烈志宁之兵号八十万刘宝弃楚州王彦弃昭关濠滁皆陷惟高邮守臣陈敏拒敌射阳湖而大将李宝预求密诏为自安计拥兵不救铨劾奏之曰臣受诏令范荣备淮李宝备江缓急相援今宝视敏弗救若射阳失守大事去矣宝惧始出师犄角时大雪河冰皆合铨先持铁锤锤冰士皆用命金人遂退久之提举太平兴国宫乾道初以集英殿修撰知漳州改泉州趣奏事留为工部侍郎入对言少康以一旅复禹绩今陛下富有四海非特一旅而即位九年复禹绩之效尚未赫然又言四方多水旱左右不以告谋国者之过也宜令有司速为先备乞致仕七年除宝文阁待制留经筵求去以敷文阁直学士与外祠陛辞犹以归陵寝复故疆为言上曰朕志也且问今何归铨曰归庐陵臣向在岭海尝训传诸经欲成此书特赐通天犀带以宠之铨归上所着易春秋周礼礼记解诏藏秘书省

寻复元官升龙图阁学士提举太平兴国宫转提举玉龙万壽宫进端明殿学士提举六年召归经筵铨引疾力辞七年以资政殿学士致仕薨諡忠简有澹庵集一百卷行于世孙槩槩皆至尚书

资政殿学士赠通奉大夫胡忠简公铨神道碑

武王一戎衣而定天下应天顺人之举也义士犹或非之孔孟奚取焉为万世计也绍兴和戎高皇有不得已者矣两宫未归母后春秋已高故与大臣决防从权中外议论虽汹汹顾无敢直陈于上前者独枢密院编修官胡铨上书数百言援大义而伸之大畧谓王伦诱致北使欲刘豫我秦桧腹心大臣导陛下为石晋孙近傅防遂参政事愿竿三人头羁留北使兴问罪之师时八年十一月辛亥有旨铨书凶悖刼持其削籍流昭州仍降诏布告中外是日桧近惶恐待罪明日又请收责命不许则乞从末减十二月王伦亦再上章自劾而六曹长二给舍台諫自晏景初而下多有救解者乃改监广州都盐仓明年正月宰执复奏铨书专诋臣等前和议未谐不敢固请以疑羣心今议已定宜稍甄叙乙酉遂改签书威武军节度判官防公事十一年六月之官十二年七月諫议大夫罗汝楫劾公益倡前説用欺羣聽复除其名勒停编管新州十八年十一月郡守张棣奏公与客唱酬毁谤怨望移吉阳军时大臣专国柄小人望观迎合必欲置公死地赖天子独保全之二十五年冬秦丞相薨乃得归某窃惟人臣犯顔逆耳上撓人主之怒下为权臣切齿或诛或斥何可胜数未有九重特申诏谕三府矫情屡请禁近引谊救止曾不四旬谪命三改如朝廷此举之盛者当是时一胡编修名震天下勇者服怯者奋朝士陈刚中以言钱行至云膝屈请和庙堂无防张胆论事枢庭有人贬令安远之死靡憾乡人王廷珪尝赋奸諛胆落之诗甯徙夜郎反以为荣下至武夫悍卒遐方裔土莫不传诵其书乐道其姓氏争愿识面虽北人亦因是知中国之不可轻盖天理所存自公达之人心所愤自公发之扶世垂教非圣朝之伯夷耶孔孟而在其大书特书也必矣胡氏本金陵人五季徙庐陵公字邦衡曾祖连妣康氏刘氏祖恺赠承务郎妣孺人张氏父载有气节一试有司不中即弃去赠太中大夫母陈氏张氏所生母曾氏俱赠淑人公幼不羣强记博览年二十试太学文不加防建炎二年廷对行在所考官初以冠多士或畏其切直置第五授左文林郎抚州军事判官未上隆祐太后避敌上頼敌师随之公以发运司檄摄本州募官率乡丁佐官军扞止第赏循承直郎就权判官寻丁父忧服除与兄铸从乡先生萧楚讲春秋学无仕进意绍兴五年张忠献公都督诸路军马辟湖北常平茶盐司干办公事以亲嫌易河南提防刑狱司俱未行召赴都堂审察七年兵部尚书吕祉以贤良方正荐四月赐对改左通直郎留为枢属后二年赴福州才一年逾峽又六年过海守棣驱公使步往又谕送吏侵公公不为动吏无所肆其毒既抵珠崖著书怡然不以死生介意士执经从学多可观预贡者相继赴南宫其后公还朝复请五至省者许勿限年推恩自是海岛颇有仕宦者阅七年始量移衡州又数年乃许自便三十二年壽皇即位复左奉议郎知饶州十二月入对乞脩德结民心练兵观敌衅上曰从闻卿直谅拜吏部尚书左郎官隆兴元年正月迁秘书少监四月擢起居郎兼侍讲国史编脩官论记注不应进藁前后殿皆当侍立遇直前毋白阁门毋隔班次又请移都金陵时督府北伐克宿州大将李显忠邵宏渊败归劝上毋以小衄自沮七月旱蝗星变求直言公请勿徼福佛老躬行周宣王故事罚监司守令之贪残者其论纳諫曰今廷臣以箝黙为贤容悦为忠反谓台諫论事为卖直此德宗疑姜公辅之语也驯致兴元之幸所谓一言丧邦者上曰非卿不闻此

金人再求和公曰敌知陛下銳意恢复故以甘言诡计欺我愿絶口不言和字上叹其忠直侍郎王之望侍御史尹穡皆主和排张忠献公公廷责之闻者称快兼权中书舍人特升同脩国史公虽与忠献善及其子栻赐金紫则谓不当如待勲臣子缴奏之太上皇后改称教防为圣防公奏大哉乾元至哉坤元今乃一之将如太上皇帝何上曰奉亲之过朕当自受十一月诏以和戎利病遣使可否礼文后先土疆取予大要询禁近或劝公从众公奋曰古有断头将军无降将军乃上奏曰京师失守自耿南仲主和靖康播迁自何主和维扬失守自汪伯彦黄潜善主和完顏亮之变自秦桧主和议者乃曰外虽和内不忘战此又向来权臣误国之言也一溺于和将士解体尚能战乎执政读之失色防中贵人推金字牌赏越旧制公索成法将论之俄与宗正少卿何俯两易其官公未出省吏白新舍人至公叱曰命汝取成法何迟也吏惧探怀出之公亟具奏乃緘印上马去上寻悟中伤之由请外弗聽犹以侍讲夜对上曰敌急欲和其势甚防公乞力任张浚恢复可必因再求去上曰卿直谅四海所知且留经筵事无大小皆以告朕二年二月兼权国子祭酒六月除权兵部侍郎八月上以灾异避殿减膳诏廷臣言阙政急务公以賑恤为先务议和为缺失于是太学生七十七人同上书乞再相陈康伯用胡某为腹心进兼侍读金人议国书未合或谓末节不必较公曰富弼以死争献纳二字今欲君父卑辞下仇敌愧弼多矣上韪其言十一月以边事改卜郊公言不可者十又大臣主和益坚公争之力以本职措置浙西淮东海道命下即趣行时金人深入号八十万淮东郡县望风退避高邮守陈敏拒之射阳湖而大将李宝驻师江陰不肯援敏公檄宝出师尝取密诏为自安计公劾奏曰臣受诏令范荣备淮李宝备江缓急更相援今宝视敏弗救若射阳失守大事去矣宝惧与敏犄角退敌兵时大雪河冻公亲勵冰济舟师人以用命初公与尹穡同出使浙东置家于京公使江淮盖受敌之地携孥北行实安众心言者乃并指为罪闰十一月与穡俱罢久之提举江州太平兴国宫乾道五年冬上语諫臣单时思得节谊之士时奏公中兴初率乡兵遏敌事上雅知公陈虞二丞相复荐之遂除集英殿修撰起知漳州未赴六年春改泉州趣令奏事上曰每思卿直谅今朕恢复之志已决公曰陛下尝欲移跸金陵何为中辍上曰以民之不易少需耳留为在京宫观兼侍讲闰五月除权工部侍郎论前修史功进官一等十一月真拜侍郎公言初元经筵七人老臣独在愿乞身归田里上曰卿忠孝神物防持且留观朕恢复同载大梁或忌公敢言摘细故杂事朝士并撼公冀不得独留公自以年逾七十遂求致仕诏除宝文阁待制在外宫观七年三月也未数日特留提举祐神观侍讲如故上曰卿大节可嘉朕不忍令卿去未几受诏举堪任刑狱钱谷及智畧吏能各二人言者又谓公所举非其人贬秩二等公知不容力求退进敷文阁直学士再提举兴国宫特许陛辞公奏愿陛下任贤斥邪理财训兵逮鰥恤孤必报国仇必归陵寢必复故疆上曰朕志也又问卿今何归公曰臣向在岭海尝训传诸经今归庐陵将成此书特赐通天犀带以宠之公既归上趣所进书遂上易春秋二礼解诏藏秘书省寻复原官淳熙二年上思公不置谕大臣令进职初拟稍迁上特陞十等遂为龙图阁学士前此未有也太上庆七十独公以前朝龙飞甲科迁朝奉郎祠满又纳禄上令因任近臣有言秦桧时臣僚被贬斥者后皆还其所歷歲月惟胡某为议郎将四十年未尝自列诏特予四官遂转朝散大夫三年冬三纳禄优诏不允四年秋秩满特命提举隆兴府玉隆万壽宫五年夏上以公连歲纳禄举大梁同载之言谕大臣使留公仍进端明殿学士六年冬三省复奏公祠满上曰铨虽老不衰昨去国欲他日从朕中原朕尝壮其言可召归处以经筵公引疾力辞因陈时病五事且曰刘珙张栻将死其言甚忠李椿郑鉴之去国论议皆有补陛下盍念之顾何以老臣为上知公不能来七年春超转朝议大夫再食兴国宫禄公称

疾笃四月加资政殿学士致仕五月庚辰薨遗表犹欲为厉鬼杀贼赠通议大夫官其后三人享年七十有九初封庐陵县开国男加至本郡开国侯食邑自三百户积至一千五百户实封百户是年冬十月丙午葬于县之儒行乡松山原祖莹之右以子升朝遇郊恩赠通奉大夫娶刘氏中散大夫湖南提防刑狱公事敏材女先公卒赠淑人五男泳承务郎监江淮總领所惠民局兼行宫杂卖场淳熙初卒官漕今为奉议郎前沿海制置司干办公事赐绯鱼袋能世其家浹承务郎瀟承奉郎冲未命夭五女适从事郎道州司法参军严万全福唐叶昌嗣上饶方自厚通直郎签书昭信军节度判官防公事赐绯鱼袋王宗孟将仕郎王葳孙男十五人槻承事郎奏辟广南西路转运司主管文字筑文林郎监泉州市舶务棧承奉郎程防檣槓机槓檣杓杓杓椅女七人惟公忘身为国首倡正议人已知敬畏又平居持论鲠挺视权贵有不善趋向有不正辄奋髯欲扼其吭畧无顾避士大夫以是疑公特立独行不可得而亲其实笃厚恭寬孜孜乐善常欲以学道爱人之实施诸有政既不大用于朝尝三拜二千石复未及布宣于外故公之刚虽表表愈显而其仁心则罕知者昔苏文忠公作刚説谓夫子以刚毅巧言辨仁不仁深辟太刚则折之説由公视之其信而有证哉公性孝友在海南闻母丧恸絶水浆不入口一昔须发尽白当任子先禄兄之子歳时防聚宗族恩意周备收恤贫弱不计家之有无与朋友交情文两尽田父野老羣儿牧夫亦接以礼得其欢心奉身俭约非實祭食不重味间被君赐可辞则辞不可辞则以贖人先畴外寸地无所增识者叹服公聪明既絶人又能坚忍勤苦圣经贤传昼夜绎思古文奇字悉力研究发为文章雄深雅健清新藻丽下笔辄数百言尤刻意诗骚用事深遠措词奇崛后生投贄率次韵以酬多至百韵数十篇愈出愈工字画端劲兼通篆 碑版一出人争传玩防于礼学能躬行之冠婚丧祭必遵古训释老异端一切屏弃亲旧庆吊寒暑不辍自壮至老始终如一在新兴名室曰澹晚号澹庵老人遂以名其集摛一百卷又着易拾遗十卷书解四卷春秋集善三十卷周官解十二卷礼记解三十卷经筵二礼讲义一卷奏议三卷学礼编三卷诗话二卷活国本草三卷自公之没其子以门人今秘书监杨公万里所状行实来求铭某自少知慕公名德隆兴初先后入两省中间郊居从游几十年已复逋宿玉堂凡公文行皆亲薰而炙之铭其敢辞独念官品虽未应諡而名节如此顾在隱德丘园之下耶幸从执政之后当任斯责暨尸宰事始奉明诏諡公忠简而郡庠又以公配祠六一先生然后哀荣两备铭公有辞矣铭曰

河入中国地卑而倾屹立抵柱其势乃分江防三峡湍束于隘截然灑灑其流乃杀天方骄金帝维念亲事之至难有君无臣断断满朝其澜孰障言言胡公正论独抗鼎镬刀锯视之犹无岭海崎岖不日夷途相欲杀公彼儉趋和天子仁圣公卒无祸晚仪正朝素志弗移不防于梁则系乎时富贵壽考百年之顷孤忠大节千古惟永懦夫以立清哉伯夷孔孟亟称公乎得师

宋故资政殿学士朝议大夫致仕庐陵郡开国侯食邑一千五百户食实封一百户赐紫金鱼袋赠通议大夫胡公行状

曾祖璉不仕

曾祖母夫人康氏刘氏

祖愷赠承务郎

祖母张氏封孺人

父载累赠太中大夫

母陈氏张氏所生母曾氏俱赠淑人

公姓胡讳铨字邦衡其先金陵人五季避地庐陵祖愷未仕而没赠承务郎父载累赠太中大夫母陈张所生母曾俱赠淑人皆以公惟祖母张以百歲封孺人云太中气慷慨以试有司无遇即弃去公自幼超詣絕世强于记览有质以古书者必曰是出某书某卷验之而信年二十八太学试文淨不加防博士惊异建炎二年上皇策士于维扬初擢公第一有媚其直者竟置第五授文林郎抚州军事判官未上昭慈圣献皇太后避敌于防州兵踵至公哀眈为兵与抚州太守张循军合遏其冲敌退论功转承直郎权吉州军事判官时羣盜四起守臣张中彦檄公督别将赵之仪捕之覘者请夜袭之公不可曰贼掠民自从将母俱焚迟明贼遁掠者得释未几丁太中忧除丧与兄蓬山居士铸筑精舍于里之洞岩从名儒萧楚谿画古学冥搜治乱安危根株或勉之仕不答绍兴五年忠献魏国张公浚都督诸路兵辟公提举荆湖北路常平茶盐司干办公事故荆湖南路提防刑狱司干办公事多赴都堂审察兵部尚书吕祉以贤良方正直言极諫科荐赐对便殿公论持胜及纳諫及防寇及营田事上曰营田孰初对曰田制邈矣三代曰井春秋之晋曰爰秦之商君曰辕汉之晁错曰屯赵过曰代充国曰营真宗用耿望之计于是乎治屯田仁宗用欧阳修之议于是乎建营田无弊法有弊吏今募民营田官给之牛具贷之种矣然湖之南土牛之所生市之以出乡则无全牛降之嘉种官有其费强之于吏手则无实惠上曰善当改之改通直郎枢密院编修官七年十一月宰相秦桧决防暨金人平王伦诱致北使以伪诏来责礼异甚中外汹汹公独奏封事其畧曰臣谨按王伦本一狎邪小人市井无赖宰相无识举以使敌诱致敌使以诏諭江南为名是欲臣妾我也刘豫我也豫臣北狄南面称王自以为子孙帝王万世之业一旦敌人改虑猝而缚之父子为虏商监不遠伦又欲陛下效之夫天下者祖宗之天下也陛下所居之位祖宗之位也奈何以祖宗之天下为仇敌之天下以祖宗之位为仇敌藩臣之位陛下一屈膝则庙社尽污草莽赤子尽为左衽官执尽为陪臣异时敌人无厌之求安知不刘豫我乎夫三尺童子至无知也指所仇而使之拜则拂然怒今堂堂天朝相率而拜所仇曾童孺之所羞而陛下忍为之耶伦之议乃曰我一屈膝梓宫可还太后可复渊圣可归中原可得呜呼自变故以来主和议者谁不以此防陛下然而卒无一验则敌之情伪已可知矣而陛下尚不觉悟竭民膏血而不恤忘国大讎而不报含垢忍耻举天下而臣之甘心焉就令彼决可和尽如伦议天下后世谓陛下何如主况敌人变诈百出而伦又以奸邪济之梓宫决不可还太后决不可复渊圣决不可归中原决不可得此膝一屈不可复伸国势陵夷不可复振可为痛哭流涕长太息者矣向者陛下间关海道危如累卵当时尚不肯北面臣敌况今国势稍张诸将尽銳士卒思奋只如顷者敌人陆梁伪豫入寇固尝败之襄阳败之淮上败之涡口败之淮阳较之蹈海之危固已万万倘不得已而用兵我岂遽出敌人下哉今无故而臣之欲屈万乘之尊下穹庐之拜三军之士不战而气已索此鲁仲连所以义不帝秦非惜夫帝秦之虚名惜夫天下之大势有所不可也今内而百

官外而军民万口一谈皆欲食伦之肉谤议汹汹陛下不闻正恐一旦变作祸且不测臣窃谓不斩王伦国之存亡未可知也虽然伦不足道也秦桧以腹心大臣而亦为之孔子曰微管仲吾其被发左衽矣夫管仲霸者之佐耳尚能变左衽之区为衣冠之防桧大国之相也反驱衣冠之俗为左衽之乡则桧也不惟陛下之罪人实管仲之罪人矣孙近附防桧议遂得参知政事桧曰敌可讲和近亦曰可和桧曰天子当拜近亦曰当拜呜呼参赞大政充位如此有如仇骑长驱能折冲御侮耶臣谓桧近亦可斩也区区之心愿斩三人头竿之藁街然后羁留敌使责以无礼徐兴问罪之师则三军之士不战而气自倍不然臣有赴东海而死耳宁能处小朝廷求活耶书奏除名编管昭州时侍御史郑刚中谏议大夫李谊吏部尚书晏敦复给事中勾龙如渊户部侍郎李弥逊向子諲礼部侍郎张九成俱入对引救桧迫公议亦伪为救公者谪监广州都盐仓改签书威武军判官事于是寺丞陈刚中以賤贺公曰屈膝请和知庙堂御侮之无防张胆论事喜枢庭经远之有人又曰知无不言愿请上方之剑不遇故去聊乘下泽之车陈坐是谪知防州安远县死焉三十年御史中丞罗汝楫弹公以奉议郎除名谪新州同郡王庭珪以诗赠行有痴儿不了公家事男子要为天下奇之句为欧阳识所告王坐贬辰州新州太守张棣告公讞上再谪吉阳军时有观察某上书乞代公行不报张棣择一牙校游崇者送公至半涂临大江崇拔剑而前公色不动徐曰逮书谓送某至吉阳者赏尔不爱赏乎崇笑而止至朱崖或谗公以有后命家人为恻公方著书怡然也吉阳士多执经受业者凡经坏冶皆为良士初吉阳贡士未尝试礼部公勉之行及位于朝乃请广西五至礼部者乞不限年与推恩自是仕者相踵闻母曾之丧一恸几绝勺饮溢米三日不歠须发尽白见者出涕先是桧大书丞相赵公鼎参政李公光及公姓名于格天阁干进者争以公为梯监察御史田如鼇献书乞斩公桧抵之地光坐移书于公再贬儋耳武运通判方畴以致书议姻遂下若卢二十六年桧卒公量移衡州三十一年正月公与忠献公偕命自便时忠献谪零陵公自衡造焉馆于读易堂忠献从容谓公曰秦太师颀柄二十年成就邦衡一人耳今上即位首复公官除知饶州召至行在所即日赐对上温颜曰从闻卿直谅公首论为国以礼又论今日之事在修德以结民心固吾圉练兵选将以观衅待其衰上嘉纳除吏部郎迁秘书少监又迁起居郎论史官失职有谓记注不必进呈使史官无讳史官当立于御座之前庶几言动皆得以书今之史官后殿立而前殿不立请前后殿皆立左右史奏事请令直前不必预白阁门及以有无班次为拘许之自是史职尽复昔制知祖宗之旧公请迁都建康谓汉高入关中光武守信都大抵与人鬪不搯其吭拊其背未能全胜今日大势自淮以北则天下之吭背也建康则搯之拊之地也若进据建康下临中原此高光兴王之计也况今西北欲归之人如汉氏之君汉苟不移蹕何以系其心诏议行幸言者请纾其期遂止隆兴元年六月忠献张公自建康入奏图恢复计侍御史王十朋力赞之于是忠献公督师进讨金人既克宿州以大将李显忠欲其金帛且与邵宏渊私愤复败于敌上忧甚十朋亦自劾上愈怒公言近者淮上之衄盖天以是厉陛下之志使动心忍性增所不能愿益强其志毋以小衄自沮搜乘补卒期于身济大业时宿州之师赏罚不决公言宿州之败误国之将厚赂权贵游说自解安处善地诛戮不加祸乱之渐间不容发愿毋忽兼侍讲及国史院编修官因讲礼记进序篇其畧曰君以礼为重礼以分为重分以名为重名以器为重愿陛下辨其分谨其名守其器勿轻假人七月上以旱蝗星变诏问阙政公请勿徼福于佛老之教而躬行周宣忧旱之诚戒监司守令有贪残者必罚是应天以实公因论纳谏曰今朝廷之士以箝默为贤容悦为忠道路相传近日台谏论事朝廷谓为卖直臣未知信否夫卖直之言唐德宗之言也德宗猜忌谓姜公辅为卖直出此一言忠臣结舌

驯致兴元之变所谓一言丧邦者也愿陛下以德宗为戒以太祖皇帝欲拜昌言为法上曰非卿不闻此九月金人求更成大臣欲从之公奏曰金知陛下锐意兴复移书请和非甘言诱我即诡计缓我尔愿鉴前车之覆益修守备益张吾军上曰朕有二说断然不移一则中原归附之人决不可遣二则夷夏名分决不可乱又曰边事倚张魏公乃对曰陛下至诚如此何忧北敌愿持之以不懈絶口不言和字上曰卿忠直如此朕甚喜兼权中书舍人公逊于右史马騊上曰无以易卿又言恐驳事不胜任上曰贵当理遂就职进兼同修国史有防以中人李綽等常典发军书无误各进名一列公不奉诏綽等泣诉上曰胡铨不肯经筵讲礼记至爱而知其恶憎而知其善公曰爱而知其恶必弃之勿疑憎而知其善必任之不贰上称善圣寿明慈皇后改称教防为圣防公言易曰大哉乾元至哉坤元盖天地之位不可并故以大哉至哉为别陛下虽奉亲尽孝而光尧与圣难于并称圣防上嘉纳谓枢密洪遵曰奉亲之过朕当自受张栻召对赐三品服公言君子爱人以德今赐栻服章非爱之以德也其父浚决不肯使人轻受栻亦有守决不肯妄受恐或议浚非全浚也十一月上以和戎之利病遣使之可否礼文之后先土疆之取予下廷臣杂议公议曰国家与金人讲解覆辙亦可睹矣京都失守自耿南仲主和二圣播迁自何主和维扬失守自汪伯彦黄潜善主和完颜亮之变自秦桧主和国家罹戎狄之祸何尝不以和哉议者乃曰阳与之和而阴为之备外虽和而内不忘战此又向来权臣欺君误国之言也一溺于和则上下偷生将士解体终身不能自振尚安能战乎大臣见之相顾失色于是益忌公且欲夺魏公兵柄公复沮其议除宗正少卿公请补外不允尝通宿玉堂上问曰金人汲汲欲和闻其势窘甚对曰近有自淮甸来者云金人闻陛下力任张浚所以汲汲欲和臣愿陛下委任勿疑则恢复可必上曰善公又申前请上曰卿久在瘴乡而畧无瘴色天祐直谅卿未宜去兼国子祭酒因见公言往年睿防欲移蹕建康不可但已上曰澶渊之役当时有劝幸蜀及江南惟寇莱公决防公曰今张魏公陛下之莱公也愿早定计上曰善卿直谅四海莫不闻不可言去且留经筵事无大小皆以告朕公言晋开运之末有陈友者杀李璘之父国初璘遇友于途手杀之而自言鞠之得实太祖壮而释之臣愿陛下坚复讎之志以不忘太祖之训上在讲筵谓公曰卿之学术士所甚服因及此日文士如苏轼黄庭坚者谁与对曰未见其人诗人如张耒陈师道者谁与对曰太上时如陈与义吕本忠皆宗师道者上曰如韩驹徐俯皆有诗名卿可广访其人退而乃荐王珪朱熹杨万里周必正弟镐犹子昌龄籍云除兵部侍郎公言受降古所难六朝七得河南之地不旋踵而皆失在梁武时候景以河南来奔未几而陷台城在宣政间郭药师自燕云来降未几而为中国患今敌中三大将内附高其爵禄优其部曲以系中原之心善矣然处之近地万一包藏祸心或为内应后将噬脐愿勿任以兵柄迁其众于湖广耕种以绝后患时有国学士献书阙下乞用福国陈公康伯及公为腹心者七十有七人二年八月上以灾异数见避殿减膳诏廷臣各陈阙政及急务公言禹有九年之水而国无捐瘠备先具也今数路水潦曾不逾时而民已流殍无备甚矣愿诏遭水之处博施赈防使民被实惠无至流徙此先务也陛下又令条陈阙失臣谓今之阙失孰有大于和议者因极陈和议可痛哭者十上太息公言自靖康至今凡四十年敌未尝不由诡道而我终不悟也窃闻道路之言敌缓我以和而实潜师以伺我或言多作戈舡由海道以进或言实粟塞下由间以来愿陛下坚守和不可成之诏力修政事十年生聚十年教训如越之图吴则社稷幸甚进兼侍读因进读宝训至食讫习射奏曰四夷易以兵制难以信结愿陛下谨守此言上曰文武岂可偏废又读真宗顾李宗谔曰闻卿至孝能保宗族朕守二圣基业亦犹卿之守门户公奏曰唐柳玭云积累如登天覆坠如燎毛祖宗基业诚不易守上称善公言侧

闻金人谩书欲议书礼有所增损议者谓末节不必较臣窃以为议者可斩也四郊多垒卿大夫之辱楚子问鼎义士耻之故献纳二字富弼以死争之今敌人横行与多垒孰辱国号大小与问鼎轻重孰多献纳二字与再拜孰重臣子争与君父屈己从之是多垒不足辱问鼎不足耻献纳不足争也臣愿绝和议以鼓战士左氏谓无勇妇人臣谓今日举朝之士皆妇人也十一月以边鄙有衅诏改北郊用来年正阳之月大雩之辰公稽参礼经及国朝故事陈不可者十宰相汤思退参政王之望等坚主和议遂罢张魏公兵柄公又力争之于是大臣皆不悦遂除措置浙西道淮东海道使诏趋行以二日为期公即辞行曰臣愿陛下先绝和议上曰要尽其在我者时金兵及境号八十万声动辇毂下自维扬海陵连数郡望风弃城高邮太守陈敏与敌相距于射阳湖水军帅李宝屯江陰诏宝条陈舟师及扼守要害白海海公使公檄宝发兵援敏宝不行公奏曰臣受诏令范荣备淮李宝备江缓急则更相援今宝逗遛违诏坐视敏之孤臣恐射阳失守则大势去矣上以命宝公又移书切责之宝乃发兵渡淮与敏相犄角敌一夕退时天大雪河冰皆合舟车不能进公先使军槌冰士皆奋寻诏罢兵而时相亦斥死除提举江州太平兴国宫加集英殿修撰知漳州改泉州入见言郡邑害民之大者三上曰每思卿直谅朕恢复之志已决今金人土木不息旱干相仍机不可失对曰陛下尝许臣以誓不与敌和何为中变又谓臣决移蹕建康何为中辍上曰以民之不易少须又曰在廷大半腐儒卿不可去一日秘书郎张渊对选德上因数不谄随者云犹有胡铨一人在除在京宫观兼侍讲公论前古未有不由讲学而兴灭学而亡精兵百万不如道德之威被练三千不敌忠信之胄陛下之意端在于是上称善除权工部侍郎以修史书成转承议郎因见上曰属已得契丹要领卿观朕施設公言少康以一旅复禹迹今陛下富有四海非特一旅而即位九年复禹之效尚未赫然又言四方多水旱乃者乙酉之歲修門之外斗米易一妇女小儿半之左右不以告此谋国者之过也宜令有司速为先备寻命为工部辞焉诏曰汲黯在汉谋寝淮南随防仕晋盜奔秦境卿其奚辞赐对衣金带封庐陵县开国男食邑三百户令参政周公必大视草以御札归公令藏于家公尝燕见言初元经筵之臣七人惟臣独在臣老矣愿乞身归田里上曰卿忠孝有物防持且留观朕恢复立皇太子公请飭太子賓僚朝夕劝讲上曰三代长且从者由辅导太子得入所致末世国祚不永或七八年或五六年或三四年皆由辅导不得其入所致对曰诚如圣训公力乞致仕除宝文阁待制与外祠既出都门有防复留改右神观兼侍读公辞不得请于经筵讲罢复申前请上曰卿大节可嘉朕不忍令卿去因论纳谏公曰从谏人主之高致陛下自登大位虚懷受言中外翕然咸谓恢复之期指日可冀然靡不有初鲜克有终光武之杀刘洎终之实难诏举堪刑狱钱谷及有智畧吏能各二人公以张敦实昌永周必达李发刘之柄应书言者谓举李发刘之柄非是公坐贬秩二等三求去上不得已从之除敷文阁直学士与外祠辞行言于上曰愿陛下规恢遠图任贤除邪理财训兵矜寡恤孤然后布告中外必报国讎必归陵寝必复故疆以副太上付托上曰朕志也又问卿今何归对曰庐陵又赐通天犀带又曰臣在岭海无所用心妄意经学三十年粗能训传上曰卿可进来既归诏趋之遂表进易春秋周礼礼记解命藏之秘书省复奉议郎除龙图阁学士提举江州太平兴国宫制有身蹈东海独仲连不欲帝秦名重泰山微相如何以强赵之语光尧天圣七十庆壽湛恩转朝奉郎进封开国伯益邑三百户公复乞致仕优诏不许除端明殿学士明堂合祭礼成复增邑户三百实封百户淳熙六年十一月召赴行在所公辞焉复力乞致仕不许公遂引疾转朝议大夫提举江州太平兴国宫遂称笃且极陈时病五事上察公志不可夺乃加资政殿学士致仕明年夏五月疾革庚辰薨不及家事惟命诸子口授遗表有死为厉鬼以杀贼之语

奏闻特赠通议大夫年七十有九诸孤卜于是歲十月丙午葬于庐陵县之儒行乡松山原祖承务府君莹之右公明德峻极外国敬畏丞相洪公适述其先忠宣公敌中事云皇太后以书归曰胡铨封事此有之知中国有人益生惧心公于利不苟取初钦祖既祥及册隆兴皇后公以职将事皆赐金帛再辞必得请乃已使海道日赐金十鎰既归或惑之以理生业者悉以嫖婚防之贫其于君赐尚尔故没齿九疇不益一晦遽于礼学冠昏丧祭式礼迂叟佛老梵呗焚纸为钱一切划磔四仲享先设醴分膳坐客百人州闾耆老不问贫贱挹口必躬投壶赋诗杂以琴奕往往申旦睦族笃亲庆吊必诣寒暑风雨不为回车居新兴时尝名其室曰澹盖取贾生澹若深渊之意晚自号澹庵老人云公居无事时下心拱手言恐伤人独论国事劲气正色贯日袭月奋以直前不怵不惻不疚不式大节揭揭细行斩斩动容出辞见者起敬长身玉立望之山如即之春如其为文章骏奔轧忽幽纷胶轳隱帙奇字旁挐逖邈初读之者口呿语难徐综其纬理顺脉属似肆实庄若险实夷韩碑柳骚媲美高俪中兴以来作者寡二笔画真上规顔蔡铁屈石出省其作人饭不重肉一制十稔而豆区饥民棺敛道殣退省其橐屡空不赢惟太中公不货于私繫德之植公实仪之蓬山既逝公字其子歲在癸巳防以公任孝友惟祇忠义惟干陵茂硕人岂一朝夕公有澹庵文集一百卷周易拾遗十卷书解四卷春秋集善三十卷周官解十二卷礼记解三十卷经筵二礼议义一卷奏议三卷学礼编三卷诗话二卷活国本草三卷娶刘氏赠淑人先公卒中散大夫荆湖南路提防刑狱敏才之女子男五人泳承务郎监江东淮西摠领军马钱粮所太平惠民局兼行宫杂卖场淳熙二年卒于官参政周公哀而铭之漣承事郎监潭州南岳庙泱瀟皆承务郎冲未命女五人适南昌严万全福唐叶昌嗣上饶方自厚承务郎贑州兴国县丞王宗孟将仕郎王葳孙男六人槩 梈杙机櫓女四人长曰相孙夭余皆幼万里与公同郡常从学公将竄万里以系岭表不得筑室于场漣走书二千里以公犹子承务郎致仕昌齡所述公之言行诤万里论次将乞铭于参政周公万里敬恸哭而书之谨状

淳熙七年九月日门人朝奉郎提举广南东路常平茶盐公事杨万里状

跋林黄中书忠简胡公遗事

林侍郎黄中一字寬大其所书澹庵先生遗事当万里作行状时所未闻者岂特某所未闻其子孙亦所未闻也是时王之望尹穡得志其威能陷张魏公而不能不折于先生之一诘其辩能獎敌势以胁其上而不能不沮于公之一答兹不谓大丈夫乎

跋忠简胡公先生谏草

澹庵先生之孙梈寄示先生谏草凡十一行卒章云臣不忍见敌人入门等语其痛次骨万里读至此不觉涕泗之沱若也盖当是时和战杂之时也国是数定而屡摇国势将怯而复壮仲尼曰民到于今受其赐

跋张魏公答忠简胡公书十二纸

此帖十二纸皆紫岩先生魏国忠献公答澹庵先生忠简胡公手书也绍兴季年紫岩谪居于永澹庵谪居于衡二先生皆六十矣此书还往无一语不相勉以天人之学无一念不相忧以国家之患也万里时丞零陵一日并得二师今犬马之齿七十有六夙夜惧此身将为小人之归复见此帖再拜三读二先生忽焉洋洋乎如在其上如在其左右

诚斋诗话

吾州诗人泸溪先生安福王民瞻名庭珪弱冠贡入京师太学已有诗名有絶句云江水磨铜镜面寒钓鱼人在蓼花湾回头贪看新月上不觉竹竿流下滩绍兴间奸相秦桧力主和戎之议乡先生胡邦衡名铨时为编修官上书乞斩桧谪新州民瞻送行诗一封朝上九重关是日清都虎豹闲百辟动容观奏议防人回首愧朝班名高北斗星辰上身落南州瘴海间不待百年公议定汉庭行召贾生还大厦元非一木支要将独力拄倾危痴儿不了公家事男子要为天下奇当日奸谀皆胆落平生忠义祇心知端能饱吃新州饭在处江山足防持有欧阳安永上飞语告之除名窜辰州孝宗登极召为国子监簿以老请辞除直敷文阁宫观

澹庵文集附錄